

প্রবন্ধ-মালা

(পরিশিষ্ট—)

ডঃ কালীপ্রসাদ সিংহ

অজা বাবাইসেনা প্রকাশনী

কচুধরম

চেংকুড়ি, শিলচর—৭৮৮০০৭

বিষ্ণুপ্রিয়া মণিপুরীর জাতীয় চরিত্র

হাবি জাতব্রতাউ নিজর নিজর চরিত্রর বৈশিষ্ট্য আকৈইহান থার ; হানতে ‘আমার এতাপারা ডাঙর জাত এহানর বৈশিষ্ট্যতে কিয়া নেয়োইতইতা ?’ বুঢ়িয়া কান্দি এহানে হতনা করতে করতে পেইলু তত্ত্ব উহানি আজি খানি ছনুৰেইও ।

‘আমিতে অরেতে বিশ্বব্রহ্মাণ্ডত হাবিত্ত ডাঙর জাতহান নাই ! আমার জাতহানর ভিতরে বারো- লাঙ্গ নাপেয়া মাতানিহান পারা — মি কিত্তাউ ভকতাউ হারনেই কিন্তু এগুলিরাওতো ডাঙরতাতে আগো আছিথাও !’ — এ মনোবৃত্তি এহান আমার বিষ্ণুপ্রিয়ার হাবিত্ত মহান জাতীয় চরিত্রহান । এচরিত্র এহান বিষ্ণুপ্রিয়ার প্রত্যেক মানুহাও শুষ্প অয়া আছেহান ; মেয়েকগো খানি দেহে বেললে উহান নুৰা ছুঁনুত পানি দিলে বরক বরক সৌঅর উসাদে জাগ্রত অরতা । জ্ঞান এতা দুই প্রকার আছেতাহে — আকতা অইলতাই অর্জিত জ্ঞান অর্থাৎ যেতা হিনপেয়া পড়াশুনা করিয়া অর্জন করানি লাগের ; যেমন, আইনষ্টাইন, মহাত্মা গান্ধী, রাজেন্দ্র প্রসাদ ইত্যাদির জ্ঞান । আরাক আকতা অইলতাই জন্মগত জ্ঞান অর্থাৎ যেতা জরম অইতেত্ত মানুহর লগে থার বারো যেতা পানারকা পড়াশুনা বা পরিশ্রম করানি না লাগের ; যেমন শুকদেব, রামকৃষ্ণ ইত্যাদির জ্ঞান । আমার ডাঙর জাত এহানর ভিতরে এ জন্মগত জ্ঞান এহানেই পুৰল । ইমে ভদ্দা মেয়েকগো দেহানিহান বাছেয়া থারতা ; মেয়েকগোরে দেহে বেললে, আর খাতির নেই, পৃথিবীর জ্ঞানীপুণী বুলতারা এতাতে অরেতে খেবগাছ-বনগাছ নাই ।

বিষ্ণুপ্রিয়া সমাজ কুন অনুকূপে কতিহান তলয়া আছি, বারো
এ জাতে জ্ঞানী মানু কইগো আছি, উহান বিবেকী মানুৰে অথবা
ভবিষ্যতে বিবেকী মানু আহিলে হারপেইতাই। এসাদে হাবিত্ত
তলে থায়া হাবিত্ত জিঙে বুলিয়া অহঙ্কার করানিত, হাবিত্ত মিস্তুল
অয়া থায়া সিদ্ধ মহৰ্ষি-মহাযোগীৰ ভাণ করানিত, হাবিত্ত অজ্ঞ
বারো নিৰ্বোধ অয়া স্বকল্পিত বিশেষণকো ত্ৰৈলোক্য পণ্ডিতৰ অভিমান
করানিত বিষ্ণুপ্রিয়াক জড়ি নেই।

জ্ঞানী অয়া অহঙ্কারী অইলে বহু খানি জাৱানি, স্বাকৰেব,
কাৰণ উসাদে অহঙ্কারী উহাৱাও কৰ্ম্মা, নীচতা, ভণ্ডামি বারো
মিথ্যাবাদিতা মিয়াম কাম পানো হৱাবেব। কিন্তু অযোগ্য বা অজ্ঞ
মানুৱাও গগনচূষী অহঙ্কার আহিলেতে উতাৱ হজক নেই। এ
অহঙ্কাৰৰ নিতাসাথী অয়া থাৱতাই ইয়া অৰ্থাৎ আগোৱ হবা
আহান দেখলে ‘অবাই, এগুলিয়ে মোৰে জিঙলো মাং’ বুলিয়া
জলিয়া পুৰিয়া ঘুন লোকমান কৰানি। বারো ইয়া গুণ উহা-
নৰে আছে পড়নেগাতে আৱ কথা নেই, সত্যৰ অপক্ৰমণ করানি,
মানুৱ কলঙ্ক বটানি, অন্যৰ অনিষ্ট করানি ইত্যাদি বিবিধ গুণ
খাটিলৰ কসৰ সাদে চৰিত্ৰত নাপয়া থাৱতা। ফলে, সত্যৰে
মিথ্যা বুলিয়া বটানি, মিথ্যাৰে সত্য বুলিয়া দেহুৱানি, সত্য
মিথ্যাৰ বিবেক উহান বুদ্ধিত জাগ্ৰত অইলেউ ধমকেয়া-সামকেয়া
ও বিবেকৰ ঘাৱগো মুজুৰে দেনা, ইজ্জ কথার অপবাখা
করানি, মানুৱ চৰিত্ৰত কলঙ্ক আৰোপ করানি, সমধৰ্মী হাবি-
ৰেলো দল হুকুৱিয়া সমাজে মূৰ হেইকৰিয়া আটানি—এতা

ইমে চরিত্রের ভিতরে ই এও ডি বাধগো ভাগলে আহের
 হত উগোর সাদে উর উর হমারহাতা; উতারকা পরিশ্রম বা
 অভ্যাসর দরকার নার । বারো হাবিত্ত আমোদজনকহান
 অইলতাই— কুনো আগোই তানুর অজ্ঞতা, অহঙ্কার, ঈর্ষ্যা,
 নীচতা উতা দেহাদিলে, উতা দেহাদের উগোরাও তানুর
 দোষ উতা হাবি চাপাদিয়া উগোরে মূর্খ, অহঙ্কারী বারো
 চরিত্তথিগো বুলিয়া প্রতিপন্ন করতারা । আমার কাদার
 লালুমিয়া চরাই মাতেরতা— হুচচরা দারোগা এগো হাবিত্ত
 সাকতিগো উনি । কিয়া বুললে, চর এতারে হবাই 'হে,—
 আকদিনতে চরকরকা নে' বুলিয়া তা না এরাদের উনি !
 ভালো ভালো !

যেতাউ অক, অহঙ্কার বারো ঈর্ষ্যার হাবিত্ত জিঙে প্রকাশ-
 হান অইলতাই— 'বুদ্ধিবৃত্তি'র গজে 'মনোবৃত্তি'র বিজয়-চক্ষা ।
 বুদ্ধিবৃত্তি এহানে মানুর জ্ঞান উহানরে নিশ্চিত করেততা । এহান
 অন্তরাখ্যার সৃজাসৃজি অভিবাক্তিহান । ঐ কারণে বুদ্ধিবৃত্তিয়ে
 সত্য-মিথ্যা হাবি দেহের বা হারপার এনং ফলস্বরূপে এ
 বুদ্ধিবৃত্তিয়ে বিবেকর সৃষ্টি করেব । মনোবৃত্তিয়ে সত্য-মিথ্যা বিচার
 নাকরের ; উদ্বেজনা বশে যেহান মুওহানাত আহের উহানরেই
 তা কর্তব্যহান বুলিয়া নিওকরের । কাম-ক্রোধ-লোভ-মোহ-
 আদিলো মানু পীড়িত অইতারাতা এ মনোবৃত্তির প্রাবল্যত ।
 এ মনোবৃত্তির প্রাবল্যলো আমি যেবাকা সাকতি বা অনুচিত
 কাম আহান করাত যিয়ারগা উবাকা রস্তুরর ভিতরেও উহানর

বিরুদ্ধে প্রতিবাদ আহান আহেরতাহে। উহানে, মাকতি বা অনুচিত কাম আহান করলে, মানুরে না দেখলেউ নিজরাঙ নিজে লাজপেয়ারতা। এহান বুদ্ধিবৃত্তির বিবেকহান। এ বুদ্ধিবৃত্তির বিবেকর অনুসরণ করলে মানু সৎ অইতারা—পবিত্র অইতারা। বুদ্ধিবৃত্তির নির্দেশ না হুনিয়া মনোবৃত্তির কথালো চললে মানু অসৎ বা চরিত্রি অইতারাতা। আমার সমাজর মেয়েকগো দেহেকুরা এতাই অহঙ্কার বারো ঈশালো উন্নত্ত অইলাকো পুরি অন্তরাগার বুদ্ধির বিবেকর নির্দেশ উহান অমানা করিয়া মনোবৃত্তির অনুসরণে নিলজ্জভাবে ছকর্ম করাত যিতেগা বিন্দু আহানো কিতিকুকম নাকরতারা। যে গিরিগিথা-নিষে নিজরে বিচাট বিজ্ঞ বা মহান্ মহর্ষি বুলিয়া নিওকরতারা, উতাই খানিক-করে নিজর ভিতরেদে আহিগো বুলেয়া নিজর দুর্বলতা, অজ্ঞতা উতা বিচার করলে নিজর ভণ্ডামী নিজরাঙেই ধরা পড়তই। কিন্তু বিষ্ণুপ্রিয়াৰ জ্ঞানী-গুণীরাঙ বুদ্ধিবৃত্তি বারো বিবেক মনোবৃত্তিরাঙ মুরগো নওয়া আছে। বিষ্ণুপ্রিয়াৰ জাতীয় চরিত্রর সূত্রহানি এহানি।

এবারে সূত্র এহানি বাস্তবর লগে মিলেয়া চেষ্টক—ভাষা বা রসবোধর জরা আগো হার নাপেইতারা উতাই সাহিত্যিক বারো সাহিত্য-সমালোচক অয়ার বুলিয়া আমার সাহিত্যরে কত্তিহান তলে আটকেয়া থছি, উহান কতো বছর পিছে সমাজর বিবেক আহিলে আপ্পানেউ হারপেইতাঙাই। সাহিত্যর ভাষাহানে বারো অসংস্কৃত পরিবেশর অপরিণীলিত ভাষা উহানে আকহান

নাগই । সাহিত্য অরতা রসের কেন্দ্র করিয়া । কিসাদে রসহানাত
কিসাদে শব্দগো প্রয়োগ করানি লাগের উহান হারপেয়া প্রয়োগ
করের উগো সাহিত্যিকগো ; বারো ভাষার লগে রসর সামঞ্জস্য
হারপেয়া সাহিত্যর রসাস্বাদন করের উগো সাহিত্য-রসজ্ঞগো ।
ততাবেয়াঃ ভাষা উহানলো হাবি রস ফুটানি সম্ভব নার ; বিশেষ
করিয়া বীররস, দার্শনিক তত্ত্ব বারো ভগবল্লীলার দিব্যপ্রেম-বিষয়ক
সাহিত্যর ভাষা সম্পূর্ণ তঙাল । এসাদে ক্ষেত্রত সংস্কৃত শব্দ ব্যব-
হার করানি উহানেই ভারতীয় হাবি উন্নত ভাষাতো চলের রীতি-
হা ; অন্যান্য ভাষার সাহিত্য আলোচনা করলে উহান জল জল
করে দেখতাঙাই । কিন্তু আমার মহান জাত এহানর স্বনির্ভরশীল
সাহিত্যিক গিরিগিথানিয়ে সংস্কৃত শব্দ উতা দেখলেই 'বাংলা'
বুলিয়া মেইথঙ খচকরতারা । তানু 'আমার শব্দ' বুলিয়া মাততারা
উতা যে প্রায় হাবি মেইতেই-শব্দ, উহান খালকরিয়া চানার অব-
সর নেই । আমি যাবগা বিশ-পচিশ বছর ধরিয়া কথা এতা মাতে
যিয়ারগা ; কিন্তু কারো কানে না হমার । ফলে বর্তমানে বিফু-
প্রিয়া ভাষালো দিতারা কীর্তন বা রাস উতার ভাষা বা শব্দ উতা
ছনলে ভিতরে থার রসবোধ উহানো ছকিয়া থাকগো অর । যেতার
রুচিবোধ উন্নত নাছে, যেতার বোধশক্তি পরিকার নাছে, ঐ অসং-
স্কৃত মানু উতার অপরিশীলিত ভাষাউতা সাহিত্যর ভাষা বা লেখ্য
ভাষা অন্য নুরাংয়ের—এহান সাহিত্য-বিচারে সর্বজন স্বীকৃতহান ।
অথচ আমার লেখক গোষ্ঠী আহানে ঐ জাত ভাষা উতারেই শ্রেষ্ঠ
অবলম্বনহান করিয়া বিফুপ্রিয়া ভাষারে অধঃপাতে বেলেয়া থইলা ।
অর্থ হার নাপেয়া আন্দাজে শব্দ প্রয়োগ করানি বা শব্দ হঙ্করানি,
বারো বিকৃত অসংস্কৃত শব্দ উতারে মৌতুপ করিয়া ধরানি এহা-
নেই লেখক এতার শ্রেষ্ঠ আদর্শহান আছে । এসাদে রুচিবিরুদ্ধ,
অপরিশীলিত বারো মনগড়া ভাষা এতা অন্য যেতারতাউ অক,

আমার ভাষাতে নাগই। ভাষা বিষয়ক কথা এতা মাততে মাততে আমি পরিশ্রান্ত; উত্তর পুনরাবৃত্তি করানি না মনেয়ার। আজিকার বক্তবাহান অইলতাই—‘এ মনোবৃত্তি এতা কিতায়া আহেরতা’? হাবিয়ে বিচার করলে উত্তর পেইতাঙাই— হাবির তলে থায়া হাহিত ডাঙর বুলিয়া নিঙ করানি, নিজর অযোগ্যতা বারো দৃষ্টিভঙ্গির নীচতা উহানরে উচ্চতম যোগ্যতা বারো পাণ্ডিত্যহান বুলিয়া নিঙকরানি, নিজে হারপাছি উহানরেই শ্রেষ্ঠহান বুলিয়া ভাবানি—এ গগনচুম্বী অহঙ্কারেস্ত এতা আহেরতা। এজাত লেখকে মনে থাযো, তুমার সাহিত্য-জগতর আয়ু মিয়াম দিনরকা নাগই; কতো বছর পিছে সাহিত্য বিচারে তুমার নাঙ-শাতো নেয়োইত্তই।

সমাজর নাঙকরা স্বয়ংসেবক দল আহানে বিশ-বাইশ বছর আগেস্ত পুরি আমার ভাষার নাঙ এহানান্ত ‘মণিপুৰী’-শব্দ এগো বেলানিরকা তলে তলে তল কাম করে যিতাৰাণা। বারো প্রচার করতারাতি—আমি বারো আমার সহকর্মী কতোগোই উনি ‘মণিপুৰী’-শব্দ এগো বেলানিরকা লাগেছি। গেলগা বছর হঠাৎ শিলচরর মেইতেই-সংস্থা আহানর নাঙেস্ত চিঠি আহান পেইলু। উহনাত মাতেছিতা—মি উনি মহা আহানর ভিতরে ‘মণিপুৰী’ শব্দ এগো বাদ দেনা, নাইলে মোর জীবনর বিপদ আছে। মি পুলিশ বিভাগে জানেইলু; নিজেও খবর লইলু। পিছে দেহুরিতা—চিঠি উহান দেছিতা মেইতেইয়ে নাগই; আমার সমাজসেবী কতোগোই। কয়েক মাস পিছে মহাসভা বারো সাহিত্য পরিষদর দল আহানে আসাম-সরকাররাঙ স্মারকপত্ৰ আহান দেনাত আহেছিল। স্মারকপত্ৰ দেনার আগে যোৱাও আয়া প্রস্তান দিলাতা—‘মণিপুৰী’ শব্দগো বাদ দিয়া অইলেউ ভাষাহান লনা উনি। মি প্রচণ্ডভাবে আপত্তি করানিয়ে তানু আর না আগুৱেইলা। তানু

এ দৃষ্টিভঙ্গির মর্মহান কিহান ? যেকুনো প্রকারে ভাবানন্দর স্বীকৃতি আহান আনিয়া সমাজে গারগো ঠিকদিয়া আটানি, বারো 'মণিপুরী'—শব্দগো তুলানিয়ে যদি সমাজেস্ত আপত্তি উঠের, উহান অইলে দোষ উহান মোরাও চাপা দেনা । 'মণিপুরী'-শব্দ এগো বাদ দিলে আমি যে ইচ্ছাদিনর ইতিহাস-কৃষ্টিত বিছিন্ন অইত্তাড়াই, বারো পিছেকার দিনেস্ত মেইতেই গিরকগাছিয়ে আমি 'মণিপুরী নাগই' উহান স্বীকার করলাও বুলিয়া চারিয়ে বারাদে ঢোল পিটতাই উবাকা আমার ইজ্জত কুস্পেই থাইত্তই-উহান ঝাল করিয়াউ না চেইলা । আত্মপ্রতিষ্ঠারকা উন্মাদ অইলে এসাদে চিন্তাধারা আহেরতা ।

বিরাট সাংস্কৃতিক অনুষ্ঠান আহানাত সমাজর বিখ্যাত গায়ক-গায়িকা আদি হাবি ধরণর শিল্পীরে পুলকরানি অছিল । কর্মকর্তা গিরকগাছিয়ে চারিশোকিলোমিটার দূরেইর শিল্পী উতার ঘরে ঘরে গিয়া নিমন্ত্ৰণ করিয়া আহিলাগা । কিন্তু বিশিষ্ট সঙ্গীত শিল্পী আগোরে উনি আর্থিক অনটনর দরুণ নিমন্ত্ৰণ করে নুৱারেছি । গিরক আগোই উগোর খরচ উতা বহন করানির ইচ্ছা প্রকাশ করানিয়ে কর্মকর্তাই কথাহানখানি সংশোধন করিয়া মাত্ৰা যে উগো স্থানীয় শিল্পীপো, বারো স্থানীয় শিল্পীরে অনুষ্ঠানে অংশ গ্রহণ করানি নাদতাই উনি । চারিশো কিলোমিটার দূরেইর শিল্পী আগো কীসাদে অয়া স্থানীয় শিল্পীগো অনা পাৱের—যে ক্ষেত্রেত উগোর লেইকির শিল্পী উতা কিন্তু স্থানীয় হিসাবে গণ্য নাছি—উহান কর্মকর্তাই জানি, বারো আমিও খানিমানি জানি । কিন্তু আসল ব্যাপারহান কিহান ? উল্লিখিত বিশেষ শিল্পী উগোই এলাখানি প্রচার করেছেতা ; বারো উতা প্রচার করতে দশগোর অনুমতি নানেছেগা । উলানে শিল্পী উগোর গজে শিষ্যপ্রেমিক গুরুরে নিজর স্বভাবমূলত দোষ আরোপ

করিয়া উগারে শিল্পী সমাজেত্ত দূরেই করেছে ; বারো ঐ শিল্পীয়ে প্রচার করেছে এলা উতা প্রচার নানির নানারকম কৌশল উদ্ভাবন করেছে । ঐ গিরকর পরামর্শলো উল্লিখিত অনুষ্ঠানর কর্মকর্তা উতাই শিল্পী উগারে বজ্রন করলাতা । পাঠক গিরকে মাতাঙাইতাই—এতা ব্যক্তিগত লুকাও লুকাও কথা । কিন্তু মোর কথাহান অইলতাই—এ সমাজরপরশ্রীকাতরতা, ঈশ্বা, সঙ্কীর্ণতা নীচতার Symbol আকেইহান অইলতাই এ ঘটনা এতা ।

আজি বাইশ বছর ধরিয়া গুট আহানে প্রচার করে আহিতারাতা—মি উনি বিষ্ণুপ্রিয়া এতা মণিপুরী নাগই বুলুরি, বিষ্ণুপ্রিয়া এতাবে ভোম-চারালর বংশ বুলুরি, বিষ্ণুপ্রিয়া ভাষা এহানরে মণিপুরী ভাষাহান নাগই বুলুরি । ‘মি কথা এতা কুস্পেই মাতেছুতা, বা ইকরেছুতা ?’ বুলিয়া আওকরলে পিছলন দিয়া যিতারাণা, কিন্তু প্রচার করানিত আল নাইতারা হাবিত্ত হাসাকর বিষয়হান অইলনাই—যবে যবে কথা আহান লুনিয়ারতা—মি উনি বাঙালীরাও জাত এহানরে বেছেছুগা উনি । এ মন্ত এহান না লুনেছি মানু আগো নেষো থাইখা । এতা মাতোরায গিরি-গিখানি উতার সাহস বারো সততা থাইলেতে প্রমাণলো অগুরেয়া আছ—মোর Challenge হান । নাইলেতে তুমি মিথাবাদী, বদমাইস, বিবধরসর্প, সভাসমাজর কলঙ্ক এবং মনুষ্যপদর অযোগ্য । আরাক হাসাকর বিষয় আহান—বিষ্ণুপ্রিয়ার পণ্ডিত বর্গট মাত্তারাতাই—মি বিষ্ণুপ্রিয়ারে মণিপুরী নাগই বুলুরি । মেইতেই গিরকগাছিয়ে বারো মি বিষ্ণুপ্রিয়ার মণিপুরীহ প্রতিপন্ন করেছু বুলিয়া উহান খণ্ডন করাত লাগেছি । মোর বক্তব্যসম্পর্কে এ দ্বিযো দলর ভিতরে যে কুণো দল আহানর মতহান সত্য অইতই ; বারো উহান অইলে বাকী দল উহানরে মুখ বুলানি লাগতই । ঐ মুখ উতা কুনতা ? আরাক গিরক আগোই বারো বিষ্ণুপ্রিয়া বারো

মেইতেইৰ বিশিষ্ট গিরক কতোগোৱাও চিঠি ইকৰিয়া অভিযোগ
কৰেছেতা--মি উনি 'মণিপুৰী কৃষ্টি এহান অসমীয়াৰাওৰো আহে-
ছেহান' বুলিয়া মাতেছ। মণিপুৰী কৃষ্টিৰ ছহান-আহান ক্ষেত্ৰত
অসমীয়াৰ প্ৰভাব আছে বুলিয়া দেহাছু উহানৰে এসাদে অপ-
ব্যাখ্যা কৰানিৰ কাৰণহান— হয় অজ্ঞতা বা সঙ্কীৰ্ণ দৃষ্টিভঙ্গি
অথবা ঈৰ্ষা বা পৰীক্ষাতৰতা বুলিয়া মাতলে লালটবতা ?

অন্য জাতৰ নিঙোলে লুহোও কৰিয়া নেছিগা প্ৰেমিক
বিষ্ণুপ্ৰিয়া উতাবে জাতে তুলানিবকা আন্তৰ্জাতিকতাৰ বুলি
দিয়া দাপা আহানে গইগো অয়া লাগেছি। ঐ প্ৰেমিক উতাবে
উনি সভাত ৰিজলিউশন নিয়া জাতে তুলানি ! হুৰ্কা-
ঙেঙো হুৰ্কাও-- মিতলেতো মিতল অয়া বিশ্বমানবতাৰ কথা
মাততে লাজো না হমার ! উদারপন্থী গিরকগাছি ! এসাদে
সামাজিক ৰিজলিউশন নিয়া জাতে তুলানিৰ নিদৰ্শন কুনো জাতে
পাছোগো ? বাৰো যোগ-বিযোগ কৰিয়া বিষয় এহান তলেয়া
চাছোগো ? অন্য জাতৰ নিঙোলৰ দাপাত হমেইতাৰাগাতা
কুংতা—যেতাৰতা আমাৰ ভাষাকৃষ্টিৰ প্ৰতি বিন্দু আহানো প্ৰীতি
নেই উতা। সভাত ৰিজলিউশন নিয়া উতাবে তুললে সমাজে
উতাবে পেইতাৰাইগো ? বাৰো নিজৰ ভাষাবৃষ্টি হাবি গোপন
কৰিয়া অন্তৰতা মালনিত এক-নম্বৰ জাত এহানৰ প্ৰেমিকগাছি
উতাই সমাজৰ এ সমৰ্থন এহান পেইলে গুৰুদাপাৰ সাদে
ছুটিয়া গিয়া অন্য জাতৰ খলেইত হমেইতাইগা ; ফলে শিক্ষিত
সমাজৰ অধিকাংশৰেই আমি হাবানিত বাধা অইতাঙাই।
আৰাক আকবেদে আমাৰ নিঙোলে পাত্ৰ নাপেয়া অন্যতাৰাং
যানাত বাধা অইতাই।— এতা কিতা খানি খালকৰেছোগো ?
নিজৰ নীচতা বাৰো বিবেকহীনতাৰে আন্তৰ্জাতিকতাৰ বুলিলো

আচ্ছাদন করানি মনেইলে ব্যাভ্রচর্মাযুত গদভর য়ারি উহান
নিঃশিঙ অয়ো ।

বর্তমানে হাবিত ডাঙর বসিকতাহান অছেতাই ক্রিয়াত
দন্তা-স-বাবহার । বিষ্ণুপ্রিয়া মণিপুরী সাহিত্য নিকুলেছে দিনেঙ
পুরি লুৰাবেলী, ফাঙ ইত্যাদি পত্রিকা, মহাসভার বেকডপত্র,
গীতিস্বামী, মদনমেহন মুখোপাধ্যায় আদি লেখকর রচনাত
বরাবর ছ-বর্ণ এগো প্রচলিত অয়া আহের । মি বিষ্ণু প্রিয়ামণিপুরী
ভাষাতত্ত্বর গবেষণা করলু সময় উহানাত হঠাৎ করে ধাতু-বিভক্তি-
প্রত্যয়র জ্ঞান নেই, বাকরণ বরো ভাষাতত্ত্বর জ্ঞান নেই গিরক
আগো-হুগোই ‘আমিও ভাষাতত্ত্ব জানিগোনা, চেইতা’ বলিয়া
ক্রিয়াত দন্তা-স বাবহার করানির লুৰা থিয়োরি আহান নিকাল
বেললা । লগে লগে তানুর একনিষ্ঠ ভক্ত উতাই আহি জিপেয়া
থিয়োরি উহান গ্রহণ করলা । বর্তমানে জ্ঞানলব্ধবিদগ্ধ, নিজর
জ্ঞানর সীমাগো সম্বন্ধে অন্ধ, পণ্ডিতম্মনা গিরক আগো হুগোই ও
থিয়োরি উহান প্রচার করাত লাগেছি । আমি ছ-বর্ণর পক্ষে কতো
যুক্তি দিয়ার, বক্তৃতা দিয়ার, প্রবন্ধ ইকরিয়ার । কিন্তু উতা হানি
হিলেপানি চইকরানিহান ! সিদ্ধারীর সভা আহানত এ সম্বন্ধে দীর্ঘ
আলোচনা করলু । আলোচনার পরে দন্তা-স পক্ষর শিখণ্ডীয়ে
দিলো শেষ যুক্তিহান—“গিরকে মাতের এহান চুম ; অইলেউ
আমার এহানেউ য়াকরের ।” সাবাস ! আরাক স্বনামধন্য সমগ্র
সমাজে বিখ্যাত নেতা অগোই দিলো যুক্তিহান—“আমার গুরু-
দেবে সভাত লেপকরিয়া দন্তা-স এগো বাবহার করানিরকা
মাতঙ্গো হানতে, উহানর বিরুদ্ধে কিসাদে যিতাঙগা ?” আহা !
গুরুভক্তির বলিহারি যাই ! আচম্বিতে উপস্থিত ‘গাবুরাপুরেই’
‘পুৰীজেলেই’ ‘বুজন’ গিরিগিথানির ভোট লয়া সভা আহানাত
কিসাদে করিয়া দন্তা-স বাবহারর রিজলিউশন লছি, উহান আমি

জানি। ব্যাকরণর রীতি বারো বানান এসাদে বুনে সভা সমাজে
 লেপকরতারাগো? কিন্তু তবুও নিজর দলর মুকশিগোই করে
 বেললো হানতে নাগইহান এইদেউ যাকরানি নাই! নাগইতা?
 বাংলা খানি তামবরে বেলিয়া গিরকগাছিয়ে বাংলার উচ্চারণ—
 ধারালো আমার উচ্চারণ বিচার করতারা। মি আমার নিজস্ব
 উচ্চারণ-ধারা উতা দেহিয়া যুক্তি দিউরি। কিন্তু মি ত্রিশ বছর
 এ ভাষার গঞ্জে গবেষণা কয়িয়া কিন্তু উ হার না পাছু; বারো
 তামু উনি মেয়েক আগো ছগো দেহিয়া বা মানু আগো-ছুগোরাও
 আঙকরিয়া ফাল আকহানাত বিজ্ঞাহানর হ-চুড়াগোত কা'ছিগা।
 ক্রিয়াত দস্তা-স ব্যবহার করলে আমার সমগ্র উচ্চারণ ধারাহান
 কিসাদে খুটো নাটো অইতই উগান মি 'প্রবন্ধমালা-পরিশিষ্ট'ত
 দেহিয়া গেছুগা। উতার গঞ্জে বর্তমানে প্রতিষ্ঠিত হাবির লেখক
 ছ-বর্ণর পক্ষে; বাংলাদেশর হাবি লেখকো ছ-বর্ণর পক্ষে। এ
 অবস্থাত দস্তা-স ব্যবহার করানি এহান আমার বানান ধারা
 বারো সাহিত্যরে দ্বিখণ্ডিত করানিহান। কিন্তু মোর যুক্তি উতা
 লইলে তামুর পাণ্ডিত্য বারো ইজ্জতে লাগের। গতিকে ইমে
 তামুর মত উহানলো চলানিয়ে সম্মানজনকহান। দস্তা-স বাদী
 গাছির দলর ভিতরে আমার যুক্তি এতা বুজেকুরা এবং বাস্তবে
 ছ-ব্যবহার করেকুরাউ আছি। কিন্তু তামু দলগত ঐক্য বজায়
 থনারকা স্পষ্ট করে আমার যুক্তি উতা স্বকার করাত নাহিতারা।
 এ দস্তা-স-বর্ণর ব্যবহারর ইতিহাস বারো রীতি অলোচনা করলে
 দেখতাঙাই— বুদ্ধিগতির গঞ্জে মনোবৃত্তির কতিহান পরিহাস;
 দেখতাঙাই— অহঙ্কার, পণ্ডিতম্মন্যতা, ঈর্ষ্যা বারো অন্ধতাই
 গারিগো চম্ব বুজলে মানুরতা কিসাদে দিগ্‌বিদিক জ্ঞান নেয়ার।
 এবাকাউ সময় না গেছেগা, দস্তা-স-বাদী গিরকগাছি! সমাজুর
 হবাহান মনেইলে— আমার ভাষা সাহিত্যরে সুন্দর করানি

মনেইলে আলথক অয়া আহো ; দলাদলির অবসান অক ।
নাইলে মনে থয়ো—অদূর ভবিষ্যতর ইতিহাসে তুমার কলঙ্ক জল
জ্বলিয়া থাইতই ।

লমইতেগা কথা আহানি—মি সমাজে বিখ্যাত কটুভাষীগো ;
আরতা হাবি হবা মানু । কিন্তু ঈর্ষা বারো ভণ্ডামীত পুরি কটু-
ভাষীতা এহানেই অনেক গুণে হবা অ'থাইব । আরাক আহান—
হাবি সমাজেউ সমস্ব আকেইহানাত এসাদে কটুভাষী আকেইগো
। জরম অইতারা—যেতা তৎকালে হাবিত নিন্দিত অইতারা, অথচ
যেতার কথা কহোদিন পিছে হাবিষে লনাত বাধা অইতারা ।

শিক্ষিত সমাজের প্রতি চারিগো কা'র *

বিফুপ্রিয়া মণিপুরী সমাজের ভাষাকৃষ্টিলো কনাকতো চর্চা করানিয়ে এবং হাবি বিষয়ে সমালোচনাত্মক বিশ্লেষণ করানির মনোবৃত্তি থানাই এ সমাজের গুণ-দোষ কুনোতাউ মোরাও অজানা নেই। উহানে এ জাতর গুণলো মি যেসাদে গৌরব বোধ করুরি, এ জাতর দোষলো উসাদে জ্বালা অনুভব করুরি। এ জাতর গুণ-দোষ বিচার করাত যিতেগা দেহুরিতা— গুণে শতকরা দশ ভাগ অইলে দোষে নব্বই ভাগ। অথচ ঐ দোষ উতা দেহেয়া উতা সংশোধন করানির কথা মাতেকুরা মানু আগো সমাজে নেই। এ জাতর দোষ দেহুরানির এবং এ জাতর উদ্দেশ্যে কটু কথা মাতানির দায়িত্বহান যেন পড়েছেতা একমাত্র মোর গজে। উহানে মি এ সমাজে কুখ্যাত মানুগো। কিন্তু কুখ্যাতিরকা মি ডর নাপাউরি। এ সমাজর নীচতা—হীনতা দর্শনে মোর অনুরে যে জ্বালার জিগো জ্বলের, এ সমাজর পরিপূর্ণ সংস্কার নাছে পেয়া—এ সমাজ স্বীয় গৌরবে প্রতিষ্ঠিত নাছে পেয়া মোর অনুরর এ জি এগো জসতে থাইতই এবং ততদিন মোর মুখেত্ত এবং কলমেত্ত কটু কথা নিকুলতই। আজি সমাজর বিশেষ চারিহান নীচতার বিরুদ্ধে মোর কটু-কথার চারিগো কা'র সন্ধান করুরি। আজিকার মোর বক্তব্য এহনি ভুলে বা পাকরলে মাততরাই যে, এতা মিয়াম ছকাও মানুর কথা; বিশ্ব-মানবতার দৃষ্টিলো পরিশীলিত এবং প্রসারিত মানসিকতাসম্পন্ন মানুরে এসাদে কথালাো ব্যস্ত না থাইতারা। কথাহান হায়হান; এতা কথা মাততে মোরতাউ লাজহানে মুরগো নহের। কিন্তু সমাজর নীচতা এতা দেখতে

* ২১ শে এপ্রিল, ১৯৯০ ইংরাজীত ত্রিপুরার ফুলতলিত 'বিফুপ্রিয়া মণিপুরী কুহিবৃত্তি সিংহপা'র দ্বারা আয়োজিত সম্মেলনে প্রদত্ত ভাষণ অংশস্বরূপে রচিত প্রবন্ধহান।

দেখতে বাধ্য অয়া এ নীচস্তরে আয়া কথা এতা মাতানিত উবা অ'ছুতা—
এহান মোর ভূভাগ্যহান ।

(১)পইলাকার মোর কা'রগো অইলতাই শিক্ষিত বিষ্ণুপ্রিয়া মণিপুরীর
অধিকাংশ পরিবারে বাংলাভাষারে কথাভাষারূপে ব্যবহার করানির
বিকল্পে । আমি দেহিয়ারতা—এ শতাব্দীর পইলাদেত্ত আধুনিক শিক্ষার
প্রচলন অনার লগে লগে আমার শিক্ষিত গিরিগিথানির ভিতরে শিক্ষা
বারো জীবনধারণ মান (Satndard) রক্ষার পথগো অছেতাই বাংলা
ততারানি এহান । পরিসংখ্যান লইলে দেখতাই যে পইলা পইলা
শিক্ষিত অছি কুনো বিষ্ণুপ্রিয়া পরিবারে এবাক পেয়া বিষ্ণুপ্রিয়া মণিপুরী
ভাষার স্থান নেই । যদিপি ঘুরা ঘুরা শিক্ষিত পরিবার ভিতরে কাছাড়—
করিমগঞ্জ অঞ্চলে বা আসামে এ রীতি এহান প্রায় নেই বুলেউ চলের,
তথাপি ত্রিপুরাত হৌ পুংতনধারা উহান বহন করিয়াই চলেছি ।
ত্রিপুরার উচ্চশিক্ষিত পরিবারর ভিতরে শতকরা নব্বইভাগ পরিবারর
কথাভাষা বাংলা । আমি আচানক অ'য়ার বিষয়হান অইলতাই—বাজালীর
যুগে তারুর ভাষা ততারেয়া মিয়াঙ মালইতে এ শিক্ষিত গিরিগিথানির
মেইথঙ উতা লাঞ্জে না ডহেরতা কিতায়া ! মাতৃভাষার স্থানে বাংলা ভাষারে
আসন দেনার অর্থহানতে এহাননাই যে, আমার ভাষা এহানলো ততারলে
খানি ছর্কাঙ অ'নিহান অ'র হান্তে মিয়াঙ ঠারহান ততারেয়া খানি ডাঙরিয়াতা
পারা অ'নি ! মাতৃভাষা ততারতে গৌরব বোধ করানি এহান যে
কুনো সভ্য জাতর লক্ষণহান । বিষ্ণুপ্রিয়া সমাজে দেহিয়ারতাই উন্টা ।
আমার শিক্ষিত গিরিগিথানিয়ে 'আমার খার এহান ততারানি খানি
হিনপাউরিতানা', 'আমার খারলো ইকরে তুরাকরিতানা' বুলতে লাজতে আপেয়া
উন্টা গৌরব বোধ করতারা । এহানরে স্থানর প্রভাবহান বুলিয়া মাতে
তুরাকরিতার; কারণ দিল্লীর বৃকে চল্লিশবছর থায়াউ যে বিষ্ণুপ্রিয়াই বাংলা
ততারতারা, বা ব্রহ্মপুত্র উপত্যকাত পঞ্চাশ বছর থায়াউ যে বিষ্ণুপ্রিয়াই
বাংলা ততারতারা উতার ক্ষেত্রত স্থান বা পরিবেশর প্রভাবলো কুনো
ব্যাখ্যা দেনা তুরাকরিতার । শিক্ষিত সমাজর এ রীতি দেখলে মনে
অ'রতা-বিষ্ণুপ্রিয়া মণিপুরী ভাষা এহানতে ছদ্দা গাঙর অশিক্ষিত আলুরা

বা বাহিনী মানুসহান অ'ছে পাউরি !

বিষ্ণুপ্রিয়া মণিপুরী শিক্ষিত সমাজর এ নীচ মনোবৃত্তির বিরুদ্ধে আজিকার মোর প্রচণ্ড আক্রমণহান—এসাদে করে নিজর মাতৃভাষা ততারতে ছুঁকাও নিওকরানি বারো আরাক ভাষা আহানরে মাতৃভাষারূপে গ্রহণ করলে গৌরব বোধ করানি এহান নীচ-মিস্তল-ছুঁকাও মানুস স্বভাবহান। এসাদে স্বভাবসম্পন্ন মানু উতা সভ্য সমাজে গণ্য অনার উপযুক্ত নাগই। আ'হানিও আহের—এসাদে গিরিগিথানি উতাই বারো বিষ্ণুপ্রিয়া মণিপুরী ভাষার সংগ্রামে মদত দিতারা বারো অংশগ্রহণে করতারা উনি ! মিয়াও-মালপা গিরিগিথানি, উসাদে ভঙামিলো সমাজরে খাতি দেনা তুবারতারাি।

উক্ত দোষে দুট গিরিগিথানিয়ে নিজর দোষ উতাত লেপ দেনারকা মাততারাতি — 'বাংলা ততারলেতে কিতা অ'ইল ? নিজর মাতৃভাষার প্রতি নিষ্ঠাহান থাইলে লমহেল নাই !' এং, বাহু আচরণ নাকারয়া মনে মনে কৃষ্ণ নিওকরানির রাগানুগা ভক্তিহানতে আমার বিষ্ণুপ্রিয়া শিক্ষিতরাও ইজু আছেহান অ'ছে ! এসাদে গিরিগিথানি কুনোগোই মাততারাতি 'অন্যান্য জাতিউ এসাদে নিজর মাতৃভাষা না ততারাকুরা অনেক আছি।' এ কথাৰ উত্তরে মি মাতানি মনাউরিতাই—এসাদে মানু অন্যান্য জাতর শিক্ষিতর ভিতরে হাজার প্রতি আগো অইবা কি নাইবা, যে ক্ষেত্রে ত বিষ্ণুপ্রিয়ার শিক্ষিতর ভিতরে শতকরা নব্বইভাগ মানু বাংলাভাষার একান্ত ভক্ত। এসাদে আরাক জাত আহান পৃথিবীত দেহা পারতারািগো ? অন্য জাতর বিশেষ ক্ষেত্র আহান-ছহানর দৃষ্টান্তলো নিজর প্রকাণ্ড দোষ উতা গুরানির চেষ্টা নাকরিয়ো। নিজর বারাদে আহিগো বুলেয়া নিজর নীচতা উহান স্বীকার করো, বারো উহান দূরেই করানির চেষ্টা করো।

(২) আজিকার দ্বিতীয় কারগো অ'ইলতাই শিক্ষিত বিষ্ণুপ্রিয়া পরিবারর ইমাইন্দোলর ভিতরে শারী-প্রচলনর বিরুদ্ধে। পরিনংখ্যান লইলে দেখতারাি যে, পইলা পইলা শিক্ষিত আছি কুনো বিষ্ণুপ্রিয়া পরিবারে মণিপুরী পুথাক নেই। হুদা 'নেই' বুলেই লম নার; মণিপুরী

পুষাক এহানরে এ গিরিগিথানিয়ে 'গাউরা' পুষাকহান বুলিয়া ঘণার
 চক্ষে দেখতারা, এবং এ পুষাক পিদতে দস্তরমতো লাজপেইতারা ।
 পিছে পিছে শিকিত অয়া আহিতারা পরিবারর ভিতরে আসাম্বর
 বিষ্ণুপ্রিয়াও শারীর প্রচলন অপেক্ষাকৃত কম, কিন্তু আচানক অয়া
 দেহিয়ার যে, ত্রিপুরার শিকিত বা অর্ধশিকিত প্রায় হাবি
 ইমা-ইন্দোলর পুষাকহান অছেতাই শারী । উচ্চশিকিত পরিবারেতে
 হজকরকাউ মণিপুরী পুষাক নেই — পূজার উপহার বুললেউ শারী,
 ঘুরা বছরর উপহারো শারী, বিয়ার পল্লভো শারী, ঘুমজিতে
 শারী, বুলতে শারী । এমন কি, যে কীর্তন-বিবাহাদি উৎসবে
 জাতীয় সংস্কৃতির পরিচয় বহন করের, ও কীর্তন-বিবাহাদিত পেয়া
 এ শিকিত গিরিগিথানিয়ে মণিপুরী পুষাক ব্যবহার করানি
 লাজপেইতারা । অনেক বিবাহ দেহেছু— যেতাত কইনাগো, কইনাগোর
 মালক, বনক, বৌবেই ইত্যাদিত চিনকরিয়া হাবিহান, মিয়াওর
 পুষাক পিদিয়া মিয়াও ঠার ততারা ততারা আত-মুর হেইকরে
 হেইকরে আটতারা । বিয়া আহানাত মিয়াও মালয়া বহেছে কইনা
 উগোরে মিয়াও-মালপী বান্ধবী উতাই সাবধান করে দিতারা—
 'সিঙইস, চাকসাবী দিতাই উতা পিদবে !' কইনাগোর 'মিয়াও-
 মালপী মালকে বারো মাতিবীতা, 'শৌ এগোই বেনারদী শারী
 ছাড়া নামনেইরীতানা !' বলিহারি ! সমগ্র ত্রিপুরাত কদাচিৎ
 আগো ছগো ছাড়া কুনো শিকিত বা অর্ধশিকিত বিষ্ণুপ্রিয়া
 গিথানক আগোরে মণিপুরী পুষাক পিদিয়া বাহিরে নিকুলতে
 মি নাদেহেছু । মিয়াওর মুণ্ডে মিয়াও মালনির এ নগ্ন নিল'জ্জতা
 এহান দেহিয়া মি নির্বাক । শিলচরর বর-দাপার নিঙোলপী গুট
 উহান হাবি একেপণে মিয়াও মালয়া সিঙ্গারীত বিয়াত আহিতে
 সিঙ্গারীর গাবুরাপুরেইর হিলর উবা খেইলা । কিন্তু তানুর নগ্ন
 নিল'জ্জতা উহানর সংশোধনতে নাকরিয়া সিঙ্গারীর মাহুরে 'সকীর্ণ-হকাও'
 বুলিয়া লেপকরলা । প্রসারিত দৃষ্টিভঙ্গিসম্পন্ন গিরকগাছি, মাতোতা—
 বাঙালী ইমাইন্দোলে কিয়া তুমার পুষাক না পিদতারাতা ?

মাতোতা—বাঙালী বিয়ার দাপা আহানে মণিপুরী পুষাক পিদিয়া বিয়াত
 গেলেগা বাঙালী গাবুরাপুরেই উতাই তানুরে পুজা করতাইতা, না,
 শ্রীপাদভূষণলো পিঠি মাঠিয়া দিতাইতা! মাতোতা—মিয়াঙর পুষাক
 পিদানির তাৎপর্যহান এহান নাগইতা যে, ডাঙরিয়া মিয়াঙর অনুকরণলো
 নিজর পরিচয় গুরিয়া তুমি মিয়াঙর পরিচয়লো ডাঙর অনা মনারায়?
 এবেদে বারো তুমিতে বক্রবাহনর বংশ—গন্ধর্ব বুলিয়াউ গর্ব চুটি আহানি
 বরোরায় উনি! অনেকে মাততারা—‘শারী এহান জাতীয় পুষাক
 (national dress) - হান; গতিকে উহান পিদতে কুনো আপত্তি করানি
 থক নেই।, বেশ! উহান অইলেতে বিষ্ণুপ্রিয়া ঠারহানো বেলেয়া জাতীয়
 ঠার (national language) হান লইবেনাই! বারো ‘বিষ্ণুপ্রিয়া’উ
 নাবুলিয়ো; ‘ভারতীয়’ বুলো। উসাদে ছেপ ছেপ চেয়া যুক্তি দিয়া বানা নাইতই।
 অনেকে বাংলা ভাষা ততারানির সপক্ষে মাততারা উসাদে পুষাকর ক্ষেত্রতো
 মাততারা যে, অগ্ন্যাগ্ন জাতেউ এসাদে অগ্ন জাতর পুষাক পিদেকুরা
 আছি। কিন্তু মোর প্রশ্নহান অ’ইলতাই—পৃথিবীত এসাদে মিতুল জাত
 আহান দেহা পারতাইগো, যে জাতর শিক্ষিত পরিবারর শতকরা
 নিরানবইগো ইমাইন্দোলে অগ্ন জাতর পুষাক পিদতারা? এসাদে
 জাত আহান দেহা পারতাইগো, যে জাতে অন্য জাতর পুষাক পিদিয়া
 বিয়া করতারা? আকথুরুম খালকরিয়া চেই—কতি মিতুল
 মনোবৃত্তিত স্বভাব এতার উদয় অরতা। সাম্যবাদী কুনো কুনো
 ইমাইন্দোলে প্রশ্ন তুলতারা, “মুনিয়তে অন্য জাতর পুষাক পিদানি;
 আমিতে কিয়া না পিদতাইতা?” এ ‘কিয়া’—র উত্তর পানা মনেইলে
 ‘মানবজাতর মনস্তত্ত্বত অনুসন্ধান করো। নিঙেলপীয়ে কিয়া জাঙেত্ত মুর
 পেয়া অলঙ্কার লাগেয়া বা পেইন্টিঙ করিয়া সাজ বাজ করতারা?
 ঘর আগোত নিঙেল বা ইমাইন্দোল আগো নাথাইলে কিয়া ঘর উগোর
 সৌন্দর্যহান নেয়োর? নিঙেল বা ইমাইন্দোলে কিয়া ঘরদুবার হাজেয়া
 মুঙেই পেইতারা? — এতা ‘কিয়া’—র কুনো উত্তর নেই; এতা
 অইলতাই নারীজাতির প্রকৃতিগত বা স্বভাবসিদ্ধ ধর্ম। একেই
 ধরণে সমাজর সৌন্দর্য্য এবং সংস্কৃতি রক্ষার প্রধান দায়িত্বহান পড়েছেতা।

নারীজাতির গঞ্জে। এহানাত 'কিয়া'-র কোনো উত্তর নেই; প্রাকৃতিক নিয়মহান এহান।

৩। মোর তৃতীয় কা'রগো — কোনো কোনো শিক্ষিত পরিবারে, বিশেষ করিয়া ত্রিপুরার তথাকথিত অনেক ডাঙরিয়া পরিবারে মাংস প্রচলনর বিরুদ্ধে। ইচ্ছাধীনকার বিফুপ্রিয়া সমাজর দৃষ্টিভঙ্গিত মাংস খানাতে বহু ছুঁয়েইর কথা; মাংস স্পর্শ করানি উহান পেয়া অশুদ্ধহান বুলিয়া পরিগণিত অ'র। অথচ কোনো কোনো শিক্ষিত গিরিগিথানিয়ে বর্তমানে ঘরে মাংস আনিয়া শ্রীপুত্র পরিবারর লগে খেইতারা। এ যুগ্য স্বভাব এহানরতাউ মূল উৎসগো অছেতা — মিয়াঙ মালনি। মিয়াঙে মাংস খেইতে তানুরাঙ 'মিতে মাংস নাখাউরি' বুলিয়া মাতানি এহান আমার ডাঙরিয়া গিরক গাছিয়ে লাঙ্গপেইতারা। ও মানসিকতা লুকেয়া থয়া শিক্ষিত গিরিগিথানিয়ে যুক্তি দিতারাতাই — এতা উনি আধুনিকতা এবং বিশ্বর মানুহর সমপর্যায়ে আহানির উপায়। ও গিরিগিথানির প্রতি মোর বক্তব্যহান অ'ইলতাই — তুমি 'আধুনিকতা'র অর্থ হার নাপাছো। 'আধুনিকতা'র অর্থ অ'ইলতাই — 'নিয়মানুবর্তিতা সময়ানুবর্তিতা, বিশ্বজগত সম্বন্ধে সচেতনতা' ইত্যাদি। নিজর আচার উল্লঙ্ঘন করানি উহানরে আমি 'উচ্ছৃঙ্খলতা' বুলিয়ার; 'আধুনিকতা' নাবুলিয়ার। সমাজ আহান অ'য়া থাইতে সমাজর নিয়ম-শৃঙ্খলা খানি মানানি লাগের; সমাজর নিয়ম-শৃঙ্খলা না মানলে সমাজর মানুহ বুলিয়া পরিচয় দেনারো তুমার অধিকার নেই। এ মাংসাহারর প্রচলন এহানে সমাজে বৈবাহিক সম্বন্ধ স্থাপনর ক্ষেত্রতো সমস্যার সৃষ্টি করেছে; কারণ এসাদে পরিবারে নিঙোল দিতে বা এসাদে পরিবারেত্ত নিঙোল আনতেগা মানুহে ইচ্ছুক নাইতারা। এমনেউ সমস্যা জড়'রিত জাত এহানাত এ মাংসাহারর প্রচলন এহানে আরতাউ সমস্যার সৃষ্টি করলো।

৪। মোর চতুর্থ কা'রগো অ'ইলতাই — অণু জাতর নিঙোলর লগে বিয়া পাতানির বিরুদ্ধে। এ সম্বন্ধে মি আগেই অনেক তীক্ষ্ণ কথা মাতেছ, কিন্তু শিক্ষিত গিরিগিথানিয়ে মোর কথা নাহনলা। চরিত্রহীন

যুবকে অন্যজাতের নিঙোলর প্রেমে পড়িয়া নিজের ভাষাকৃষ্টিত অ'করিয়া
 হাবিতা বিসর্জন দিতারা ; উতার গঞ্জে বিবেকহীন কুমো কুনো
 ইমাবাবায়ে ও চরিত্রহীন যুবকরে মদত দিয়া সামাজিকভাবে বিয়া উতা
 পাতে দিতারা । এমাদে কবিয়া কতো এম., এ., এম., এস., ছি.;
 ডাক্তার, ইঞ্জিনিয়ার, প্রফেসর বারো অফিসার অন্য জাতের নিঙোলরাও
 আত্মসমর্পণ করেছি উতার পরিসংখ্যান আমরাও আছে । অন্যজাতের
 নিঙোলর লগে এমাদে বিয়া পাতানি এহানর অন্তরালে আছে আসল
 মনোবৃত্তিহান অ'ইলতাই — নিজের ভাষাকৃষ্টির প্রতি অশ্রদ্ধা বারো অন্য
 জাত মালনির প্রবণতা । এ ব্যাপার এহানে আমার শিক্ষিত নিঙোলর
 বিয়ার ক্ষেত্রে কতি ডাঙর সমস্যার সৃষ্টি করেছে, উহান শিক্ষিত
 নিঙোল বিয়া দেনা ঘুরারিয়া দিনরাতি চিন্তাজ্বরে ডহিয়া অছি ইমাবাবা
 উতাই হবা করে জানি । আমার জাতে নিকুলতারা অল্পসংখ্যক
 উচ্চশিক্ষিত নিঙোল এগিরে পেয়া বিয়া দেনার পাত্র বিছাচেয়া নাপেয়ারতা
 কিতারা ? যথাযথ আলোচনা করলে দেখতাই যে, এহানার ডাঙর
 কারণ আহান অ'ইলতাই — যেগি উচ্চশিক্ষিত যুবক নিকুলতারা, উতার
 অনেকেই অন্যজাতের নিঙোলর সেবক অ'লড়লাগাকো পুরি নিজের
 জাতের হাবিতা পাহরতারা (দ্রষ্টব্যঃ শান্তিরেখা সিংহ বারো নিরুপমা
 সিংহর 'শিক্ষিত নিঙোলর বিবাহ-সমস্যা') । উহানে নিঙোল আগোরে
 উচ্চশিক্ষিত করানির অর্থহান অ'ইলতাই — নিঙোল উগোর বিয়ার
 সমস্যার সৃষ্টি করানি । শিক্ষিত যুবকর অনেকেই যদি অন্য জাতের
 নিঙোলর লগে বিয়া পাততারা, উহান অ'ইলে আমার শিক্ষিত নিঙোলর
 প্রতিহান কিহান ? আমার নিঙোলরে অন্য জাতে বিয়া দিতাওইতা ?
 উহান অমাটিক সহজহান নাগই । অন্য জাতের নিঙোল আগো আনানি
 উহান অনেক সহজ, কিন্তু অন্য জাতে নিঙোল আগো দেনা উহান
 অতো সহজহান নাগই । কারণ আমার নিঙোল আগোর পক্ষে অন্য
 জাতের পরিবেশ, কৃষ্টি, খানাপিনা ইত্যাদির লগে নিজেরে খাপ
 খোঁরানি উহান নিতান্ত কঠিন ব্যাপারহান । উপরন্তু, এমাদে অন্য
 জাতের লগে পাততারা বিয়া উতা প্রায় হাবি ক্ষেত্রেই চরিত্রের

শৈথিল্যজনিত। গতিকে নেহিয়ারতা, নিঙোলবে শিক্ষিত করানি মনেইলে অন্যজাতে বিয়া দেনারকাউ প্রস্তুত থানা লাগতই এবং অন্যজাতে বিয়া দেনারকা নিঙোলরে শিক্ষার লগে লগে চরিত্রহীন অ'নারকাউ উৎসাহ দেনা লাগতই ! এতা হাবিরকা দায়ী চরিত্রহীন বারো বিবেকহীন শিক্ষিত যুবক এবং উতার বিবেকহীন ইমাবাবা। গতিকে আমার শিক্ষিত নিঙোলর ভবিষ্যতরকা বুলিয়া এসাদে অন্যজাতর নিঙোলর লগে বিয়া পাতানি এহান একাকাই বন্ধ করানি লাগতই। এ উদ্দেশ্যে যেতা যেতাই এসাদে অন্যজাতর লগে বিয়া পাতেছি, উতারে একাকাই সামাজিকভাবে বয়কট করানি উহান অবশ্য কর্তব্যহান—এহানর কুনো বিকল্প নেই। ডাঙরিয়া গিরকগাছি ! তুমি আমারে সঙ্কীর্ণমনা, প্রাচীনপন্থী, রক্ষণশীল বা যেতা বুলিয়াউ খাই, আমি নিশ্চিতভাবে জানি—আমার কথা এতা নিকুলেরতা আমার নিঙোলর প্রতি দরদ এবং সমাজর প্রতি একান্ত প্রেমের, তুমার কথা বা ব্যবহার নিকুলেরতা স্বার্থপরতা, চরিত্রহীনতা বাবে বিবেকহীনতাস্ত।

উপরোক্ত চারি দোষে ছুটি গিরিগিথানির ডাঙর অস্ত্রহান অ'ইলতাই—বিশ্বমানবতা এবং সমাজবাদর বুলি। অর্থাৎ এ গিরকগাছির মতে 'মোর জাত, তোর জাত' বুলিয়া মাতানি এহান সঙ্কীর্ণতাহান, জাত কাত বেলেয়া হাবি এক অনা উনি ! একাত কথাস্ত মনে অরতা—নিজর ভাষা-কৃষ্টি পরিত্যাগ করিয়া বিশ্বমানব অনার দৃষ্টান্ততে ইমে বিষ্ণুপ্রিয়ারাও আছেহান আছে ! বিশ্বমানব অ'না উহান অতো সস্তা বস্তুহান নাগই। আগে জাতীয়তাবোধ আহিলে পিছে বিশ্বমানবতা বোধ আহেরতা; জাতীয়তা বাদ দিয়া বিশ্বমানবতা নাগই। কামক্রোধ নেই, কুনো অহুভব নেই টুণ্ডা আপাউপা আগোরে বেদান্তর ব্রহ্মজ্ঞান হিকানি সম্ভব নেই। ঠিক উসাদে নিজর সমাজ সম্বন্ধে চেতনা নেই মানু উগোই বিশ্বমানবতার বুলি দেনা উহান বাতুলতাহান। কনাক সময়ত শৌরে শাসন করানি লাগের; পিছে যৌবন আহিলে বা নাগরিক অ'য়া হুদেইলে তানুরে অমাতিক শাসন নাকরলেউ চলের। বর্তমানে আমার সমাজহান কনাকশৌর স্তরে আছে; এ সময়ত সমাজরে শাসনর ভিতরে থনা লাগের।

উহানলো বিশ্বমানবতাবাদীর প্রতি মোর অনুরোধহান—আহের পক্ষাশ
বছরর ভিতরে বিশ্বমানবতার কথা উচ্চারণ নাকরियो। আগে অন্যান্য
জাতর সাদে নিজর ভাষাকৃষ্টিলো উবা অ নি হিকো; পিছে বিশ্বমানব
অ'গো।

অ'গেকার আলোচনার সূত্র ধরিয়া সংক্ষেপে মাতিক বুললে
এহানেই মাতানি লাগতই যে, আমার লিখিত সমাজর আদর্শহান
অ'ছেতাই—ভাষাত, পুষাকে, আচরণে বারো আহাৰবিহারে সম্পূর্ণ
অন্যজাত—বিশেষ করিয়া মিয়াঙ মালনি। উহান অ'ইলেতে
মোইতেইয়ে তুমারে মিয়াঙ বা ডোম বুললেতে কিয়াউ বা
শৌঅ'রাই? তুমি মিয়াঙর আচরণ কর নি, বারো অন্যজাতই মিয়াঙ
বুললেউ শৌঅ'নি উহানতে কিজাত কর্নহান? আজি মোর পরিষ্কার
কথাহান—যদি নিজর ভাষাকৃষ্টিরে অমাটিকৌ ঘণা করোয়ায়, উহান
অ'ইলেতে আপ্পানে নিজর ভাষাকৃষ্টির প্রতি ভক্তি দেহেয়া অভিনয়
নাকরियो। হাবিরে এরা দেই; জাত এহান মাঙো যাকগা —যেগোই
যেবেদে মন উবেদে যাকগা। নিজর ভাষাকৃষ্টি রক্ষা করানি মনেইলেতে
মিয়াঙ মালনির এ নীচতা—মিডল স্বভাব এহান একবাকাই
বেলেই। মি যুবক সমাজরে আহ্বান কররি—একবাকাই তুমি আমার
ভাষাকৃষ্টি রক্ষারকা আগ বাড়িয়া আহো। এ জাত এহান পৃথিবীত
তঙাল জাতহান। গীতিস্বামীর আমলেত্ত দেহিয়ারতা—জাত এহানরে
'নিজর ভাষা ততারেই' বারো 'নিজর ভাষালো লেইরিকর অর্থ দেই'
বুলিয়াউ হিল উড়ানি লাগের; 'নিজর পুষাক পিদো' বুলিয়াউ হিল
উড়ানি লাগের। এতা কথা ছনতে সাকতি অ'ইলেউ আজি মি
মাতানিত বাধ্য; কারণ সমাজ এহান এবাকা পেয়াউ এসাদে মিত্তল
অ'য়া থাইলা এহান অত্যন্ত দ্বন্দ্ববিদারকহান এবং সমাজর এ
স্বভাবর একবাকাই পরিবর্তন নাইরে সমাজ এহান অচিরে ধ্বংস
অ'ইতে বাধ্য।

নিরপেক্ষতার অর্থ

দীর্ঘদিন ধরিয়৷ দেহে আয়ারতা — বিফুপ্রিয়া মণিপুরী সমাজে কুনো ব্যাপারে মতভেদ দেহাদিয়া দল দুহান সৃষ্টি অইলে আরাক দল আহান নিরপেক্ষ বিচারকর নাঙলো আত্মপ্ৰকাশ করতারা। এ তথাকথিত নিরপেক্ষ বিচারক দল এহানর বুলিহান অরতাই—তানু বিবদমান দল দিয়োহানির কুনো আহানর পক্ষেউ নাগই; তানু চেইতারাতাই দল দিয়োহানির ভিতরে ঐক্য আনানি। ঐক্য বা মিলন আনানি এহান অতি হবা কথাহান—উহানাত সন্দেহ নেই এবং নিরপেক্ষ বিচারলো এ মিলন আনানি লাগের, উহানো হাবি হবা মানুরে স্বীকার করতাইহান। কিন্তু কিসাদে মিলন আনানি, বারো নিরপেক্ষ বিচার কিসাদে করানি—এ দিয়ো ব্যাপারেই দেহিয়ারতা—তথাকথিত নিরপেক্ষ বিচারক গিরকগাছির গোপন মনোবৃত্তি খানি।

এ মনোবৃত্তির দিগন্ত তথাকথিত নিরপেক্ষ বিচারক এতাবে দুইভাগে ভাগ করানি যাকরের। (১) আকতা অইলতাই—মূলতঃ বিবদমান দল দিয়োহানির ভিতরে দল আহানর সমর্থক। তানুর সমর্থিত দল উহানরে জিঙুরানি বা প্রতিষ্ঠিত করানিরকা বারো অন্য দল উহানরে আয়ত্তে আনানিরকা তানু নিরপেক্ষ বিচারকর ভূমিকালো অভিনয় করতারা। এসাদে ধরণর মানু উতা হাবিত্ত জিঙে অবিশ্বাস্য বারো শত্রুতো জিঙে বিপজ্জনক। (২) আরাক দল আহানর মনোবৃত্তিহান অইলতাই—তানু নিজে মিয়াম হবা বা মহং মানু; কারণ তানু কুনো দলভুক্ত নাগই। নিরপেক্ষ বিচার বুলতে তানু নিঙকরতারাতাই—দিয়ো দলর কুনো বারাদেউ নানি এবং দিয়ো দলর মানুরাতো তানু উন্নত মানসিকতা সম্পন্ন মহং মানু আকতা—উহান প্রতিপন্ন করানি। তানুর মতহান অইলতাই—দিয়ো দলে লাগতরা মাহেইতে দিয়োতাউ হবানেইতা; গতিকে দিয়োতারেউ খানি গালেয়া, খানি থাকাত দিয়া, বারো দিয়োতার মত দিয়োহানির—তাউ খানি লয়া, খানি থরা উন্নি দিয়োতার মিলন সাধন করানি,

অর্থাৎ হাবিরে সত্য আহানাত আনানি । সূক্ষ্মভাবে বিচার করলে
 ও প্রিয়গাছির মানসিকতা হাবিরে হারপানি মিয়াম কঠিন নেই ।
 সত্য বারো অসত্যর ভিতরে মিলন নার; মিলন অসত্য অসত্য
 ভাগ করিয়া সত্য গ্রহণ করলে । বারো দিয়ো দলর বুনোথারাদেউ
 নানি উহানরে নিরপেক্ষতা নাবুলতার; নিরপেক্ষতা বুলতারাতা
 বিচারলো সত্য উহান মুঙহানাত চেতকরে ধরিয়া যে কুনো অবস্থাত
 সত্যর পক্ষে থানা উহানরে । অর্থাৎ সত্য পথে থাইতারাতা উতা
 বিরোধী বা শত্রু অইলেউ তানুরে সমর্থন করানি এবং অসত্য পথে
 থাইতারাতা উতা নিতান্ত নিজর মানু অইলেউ তানুর পক্ষ অবলম্বন
 নাকরানি উহানেই নিরপেক্ষতাহান । বিচারকইগোই যেবাকা সত্য
 বিচার করিয়া নিজর মানুগোরেউ দোষীগো বুলিয়া সাব্যস্ত কহের
 উবাঝাহে উগোরে নিরপেক্ষ বিচারকগো বুলিয়ারতা । কুনো দলেদেউ
 নায়া দিয়োতারারেউ গালেয়া মিলন করানি মনেইতার। উতারে আমি
 ‘লুকত ফুরুত’ বুলিয়া মাতিয়ার; নিরপেক্ষ বিচারক নাবুলিয়ার ।
 যুধিষ্ঠির সম্পর্কে “হেই! যুধিষ্ঠির এগৌ কি মানুগোথাও! অইলো
 বেইবুনির লগে যুদ্ধ করতো।” “বাযো, দুর্ঘোষনো কিতা, যুধিষ্ঠিরো
 কিতা, দ্বাতাউ ইনে আকতানা। অইলো বেইবুনিরে বেইবুনিরে এসাদে
 লাগতা?”—এতা নিরপেক্ষ বিচারকর কথা নাগই; লুকত ফুরুত কথা ।
 নিরপেক্ষ বিচারক উতাইতে বিছুরর সাদে বারো দুর্ঘোষনর বেয়ক বিকর্ণর
 সাদে সত্য বিচার করিয়া আত্মীয় অনা সন্তেও দুর্ঘোষনরে পরিত্যাগ
 করিয়া যুধিষ্ঠিরর পক্ষ লইতার। গতিকে যেতাই নিরপেক্ষ ভূমিকা লনা
 মনেইতার। উতার উচিত কর্মহান অইলগাই—যুক্তির মাপকাঠিলো
 সত্যাসত্যর যথার্থ বিচার করিয়া সত্যর পক্ষ উহানাত থানা এবং নিজর
 প্রিয়জন বা সমদলর মানুবেউ যদি অসত্য মার্গত থাইতার, উতারে
 পরিত্যাগ কহানি । বারো আরাক আহান মনে থনা লাগতই যে হাবি
 সমাজেউ বারো হাবি সময়েউ দলাদলি থাইতই; কারণ স্বার্থসিদ্ধি বা অন্যান্য
 কারনে মানুর চিন্তাধারা এবং কর্মধারা ভিন্ন ভিন্ন অইতে বাধ্য । সত্য-
 বিসঙ্গন দিয়া ছদ্মা মিলনর কাজে মিলন করানি মনেইলে সমাজে

উত্তর শিব-দক্ষিণশিব-প্রসঙ্গ

মানু আগো মরলে তার মৃতদেহ উগোর মুরগো উত্তরেদে দিয়া উঠানে ঘুমাদিয়ার, বারো দাহ করানির সময়তো খাশানহানাত উত্তরেদে মুরগো দিয়া ঘুমাদিয়ার—এহান বিষ্ণুপ্রিয়া মণিপুরী সমাজর ইচ্ছাদিনকার রীতিহান। বর্তমানে কাছাড়র নরসিংহ পুরর ব্রাহ্মণ গিরক আগোই এ রীতি এহানরে তুল বুলিয়া মাভের এরং মৃতদেহর শিব দক্ষিণেদে দেনা থকর বুলিয়া প্রচার করেব। এ মত এহান প্রচার করানিয়ে নরসিংহপুরর মানু সম্পূর্ণ দ্বিদলে বিভক্ত অ'ছি এবং দ্বিয়ো দলর ভিতরে বিষাক্ত পরিবেশ আহানর সৃষ্টি অ'ছে। মানু আগো মরানিয়ে মরেছে উগো বা উগোর পরিবার সম্বন্ধে চিন্তা করানিতে দূরেইব কথা; হুদা তার মুরগো উত্তরেদে অ'ইতো, না দক্ষিণেদে অ'ইতো; কুন মতে খাইলে কুংগোই ইসালপা বা ডাকুলা অ'না, বা কুংগোই পুরোহিতর কাম করানি—এ চিন্তা বারো বিতর্কলো মানুর ঘুম তুম নেয়ার। এ মতভেদর দরুন কুনো কুনো মানুর মৃতদেহ সংস্কারে বা শ্রাদ্ধকর্মত নিতান্ত নিজর আত্মীয় পেয়াউ না হমাইতারা। কুনো কুনো ক্ষেত্রত পুলিশর সাহায্য নিয়া শ্রাদ্ধ করানি অ'ছে বুলিয়াউ খবর পেয়ার। উহানেতে নরসিংপুরর মানু এতা মরানি পেয়া ডরপেইতারা। আসলে এতা অতি তর্কাতর্ক কথা। আগোই মৃতদেহরে দক্ষিণশিব করিয়া দাহ করলো বুলিয়া উহানলো এসাদে ডাঙর দলাদলি করানির কুনো কারণ নেই; কারণ, উহানে কুনো ব্যক্তিব্রতা বা সমাজব্রতাউ কুনো ক্ষতি নার। কিন্তু বিষ্ণুপ্রিয়া সমাজর রীতি তেডাল। আমি নিঙশিঙ অ'য়ার—বিষ্ণুপ্রিয়া কতোগোই বাঙালী সাধু আগোরাঙতো দীক্ষা লাহিলা বুলিয়া তানুরে 'সৈদনামী' আখ্যা দিয়া তানুরেলো সমগ্র সমাজে কিসাদে মারকীয় দলাদলির সৃষ্টি, অ'ছিল ও দলাদলির সময়ত, পরস্পর বিপক্ষী অ'ইলে বেইবানির ভিতরে পেয়া আগোর ছেয়াগো আগোই ছকইলে মাঙ বুলিয়া গিনেইলা; আগোর ঘরো আগোই জি পেয়া নানলাগা ইত্যাদি। আমি নিঙশিঙ অ'য়ার—আকতাই ডোমর শ্রাদ্ধত গিয়া চিড়া-কাপক খাছিলগা বুলিয়া উতারে 'ডোমর দল' আখ্যালো দল আহানর সৃষ্টি করিয়া কিসাদে গাঙ-ঘর করত করত করলা। অথচ বর্তমানে এ সমাজে বহির্জগতর

মিঙালহান খানি আয়া পড়ানিয়ে ঐ বাপার উত্বারে দুখীয়া বুলিয়া কুনোগোই নাউ নিঙ করতারা; উত্বালো দলাদলি ও নাকরতারা। আমি নিঙশিঙ অ'য়ার- আমার কনাক কালে আমার গাঙর মানু কতোগোই শিলচরে গিয়া সেলকম বেচলাগা বুলিয়া উত্বারে সমাজর অপমানকারী ছর্কাঙ মানু বুলিয়া 'সেলকমর দল' আখ্যালো দল আহান খেইকরিয়া তানুরে গাঙর মাঙপে হমানি নাদেছিল। বত'মানে সেলকম বেছানি উহানরে কুনোগোই অপমান জনকহান বুলিয়া নাউ নিঙকরতারা; উত্বালো দলাদলির কথাউ না উঠের। আরাকৌ নিঙশিঙ অ'য়ার—প্রচলিত সপিঙীকরণরূপ-শ্রাদ্ধপদ্ধতি অনুসরণ নাকরিয়া আমার গাঙর কতোগোই পুঙকাত বা শ্রীকৃষ্ণপ্রীতি পদ্ধতিলো শ্রাদ্ধ করলা বুলিয়া সমাজর ডাঙর দল আহানে ঐ শ্রাদ্ধত না হমেয়া কিসাদে দলাদলির সৃষ্টি করেছিল। বত'মানে শ্রীকৃষ্ণপ্রীতিপদ্ধতিলো শ্রাদ্ধ করতে কুনো দলাদলিরো সৃষ্টি না'র। বত'-মানর উত্তরশির-দক্ষিণশিরর মতভেদৌ উসাদে আকদিন শূন্যত জাহিয়া যিতইগা, অর্থাৎ উত্তরশির বা দক্ষিণশিরর যে কুনো পদ্ধতিলো মৃতদেহ দাহ করলেউ উত্বালো সমাজে কুনো দলাদলির সৃষ্টি না'ইতই—এহান হিমালয়র সাদে স্থির নিশ্চিতহান। তথাপি বত'মানে এ বিষয়লো প্রচণ্ড দলাদলির সৃষ্টি অ'নাই এ সম্বন্ধে বক্তব্য খানি খনাত বাধা অ'ইলাঙ।

নিজর বক্তব্য খনার আগে উক্ত মত দ্বিযোহানির সপক্ষে শাস্ত্রীয় বিধান কিতা আছে, উহান ইবা করে চেইক। বত'মানে প্রস্তাবিত দক্ষিণশির মতর পক্ষে আছে শাস্ত্রীয় বিধানহানি এহানি—

ক) “সামবেদিশরম্ অধোমুখং দক্ষিণাশিরসং কৃত্বা, তদিতরবেদিশরং তু অধোমুখম্ উত্তরাশিরসং কৃত্বা দহেৎ। নারীশরং তু উত্তানদেহম্ উত্তরাশিরসং কৃত্বা দহেৎ।”—(হরিদাস সিদ্ধান্তবাগীশকৃত 'স্মৃতিচিন্তামণি')—অর্থাৎ সমবেদীর মৃতদেহ উগো দক্ষিণ-শির করিয়া, এবং অন্যবেদীর মৃতদেহ উগো উত্তরশির করিয়া দাহ করানি লাগের। স্ত্রীর মৃতদেহ উত্তরশির করিয়া দাহ করানি লাগের।

খ) “তত্ত্রোত্তানং নিপাত্যৈনং দক্ষিণাশিরসং মুখে”—(ছান্দোগ্যোপনিষদ্) অর্থাৎ মৃতদেহরে দক্ষিণশির করিয়া দাহ করানি লাগের।

গ) “ততঃ শনৈভূতলে বৈ দক্ষিণাশিরসং শরম্ । স্থাপয়িত্বা চিতাভূমৌ পূর্বোক্তং শ্রাদ্ধমাচরেৎ ॥” — (গরুড় পুরাণ, উত্তর খণ্ড, পঞ্চম অধ্যায়) — অর্থাৎ মৃতদেহেরে দক্ষিণশির করিয়া দাহ করানি লাগের ।

ঘ) “দক্ষিণায়াং শিরঃ কৃত্বা সলিলে তং নিধায়চ । তস্যা (চিতায়াঃ) উপরি সংস্থাপ্য দক্ষিণাগ্রং শিরস্তথা ॥” —

(শঙ্করকল্পদ্রমে উদ্ধৃত) — অর্থাৎ মৃতদেহেরে দক্ষিণ-শির করিয়া চিতাগোত বহানি লাগের ।

ঙ। “সগোত্রজৈঃ গৃহীত্বা তু চিতামারোপ্যতে শিরঃ । অধোমুখো দক্ষিণাচরণস্তু পুমানিতি ॥” — (আদিত্যপুরাণ, রঘুনন্দনকর্তৃক উদ্ধৃত)

“দক্ষিণাচরণম্ ইত্যেনেন উত্তরশিরস্ত্বং যৎ তৎ সামগেতরপরম্ ” — (তট্টীকা) অর্থাৎ সামবেদী ভিন্ন অন্যবেদীর মৃতদেহ উত্তরশির করিয়া এবং সামবেদীর মৃতদেহ দক্ষিণশির করিয়া দাহ করানি লাগের ।

চ) “দক্ষিণাশিরসং সামগম অধোমুখং পুমাংসং ন্যাসেৎ — — — সামগেতরেযাম্ উত্তরশিরস্ত্বম্ ।” — (পূজাপদ্ধতি) — অর্থাৎ সামবেদীর মৃতদেহ দক্ষিণশির করিয়া, এবং অন্যবেদীর মৃতদেহ উত্তরশির করিয়া দাহ করানি থকর ।

ইহুদিন প্রচলিত উত্তরশির মতর পক্ষে আছে শাস্ত্রীয় বিধানহানি এহানি—

ক) “গতে প্রাণে প্রেতম্ উত্তরাশিরসং কুশোপরি সংস্থাপ্য ...” — (অন্ত্যেষ্টিক্রিয়াপদ্ধতি) — অর্থাৎ মৃতদেহগোরে উত্তরশির করিয়া কুশর গজে বহানি লাগের । এহান সর্ববেদীর কারণে সাধারণ বিধিহান ।

খ) “অথাসন্নমরণকালে ... গোময়েন উপলিপ্তায়াং বহিভূমৌ তুলসীবৃক্ষসন্নিধৌ হরিং সঙ্কীর্তয়ন্ আসন্নমরণং দেহং নীত্বা উত্তরাশিরসং শায়য়িত্বা ত্রীতুলসীং স্পর্শয়ীত্বা ইদং পঠেৎ ” — (প্রয়োগচিন্তামণি)

— অর্থাৎ মানুষ আগোর মরণকাল আহিলে তারে ঘরর বাহিরে নিয়া উত্তরশির করিয়া থয়া তুলসীবৃক্ষ স্পর্শ কররানি লাগের । এহান সামবেদীর কারণে বিশেষ বিধানহান ।

গজর আলোচনাত্ত দেখিয়ার যে, সামবেদীর কারণে দক্ষিণ-শির পক্ষেই শাস্ত্রীয় বিধান মিয়াম, উত্তরশির পক্ষে শাস্ত্রীয় বিধান কম। তবে উত্তরশির পক্ষ এহানৌ যে শাস্ত্রসম্মতহান, উহানাত কুনো সন্দেহ নেই। গতিকে প্রচলিত উত্তরশির মত উহান ভুল বুলিয়া নুৰা করে আরাক মত আহান চালানি উহান নিরর্থকহান।

যদি কুনোগোই মাততারা যে, উত্তরশির মতর পক্ষে শাস্ত্রীয় সমর্থন কম থানাই মত উহান অনুসরণ করানি থক নেই, উহান অ'ইলে আমি মাততাড়াইতা— শাস্ত্রীয় প্রমাণ কম অ'নাতে কেনে, এ মতর পক্ষে শুধু শাস্ত্রীয় প্রমাণ নেয়োইলেউ এহানরে আমি লোকাচার- প্রমাণলো সমর্থন করে পারিয়ার। আমার সামাজিক হাবি আচার শাস্ত্রলো বিচার করানি মনেইলেতে, শাস্ত্রলো আহিকতা— আমার সমাজে কইহান রীতি শাস্ত্রসম্মত, বারো কইহান রীতি শাস্ত্রসম্মত নাগই বিচার করিক। (১) পইলাই ম'তিক, আমি দশবিধ সংস্কার শাস্ত্র-অনুযায়ী করিয়ারগো? পইলা মালকগো গভ'বতী অ'ইরী উপেই গভ'ধান সংস্কার করানি লাগের; শৌগো জরম অ'ইলে জাত- সংস্কার করানি লাগের; একাদশ বছর বয়সে উপনয়ন করানি লাগের। এতা কুনোতাউ আমি নিয়মমতো নাকরিয়ার। (২) দ্বিতীয়তঃ জীবনর হাবিত্ত উল্লেখযোগ্য যে বিবাহ সংস্কার, উহান আমি শাস্ত্রানুযায়ী করিয়ারগো? বিবাহত কঢ়াদাতাই হোম করানি লাগের বুলিয়া স্মৃতিশাস্ত্রই বিধান দেছে; রাধাকৃষ্ণর লীলাগান করিয়া মিলন-সঙ্গীতলো বিয়া দেনা বুলিয়া কুনো শাস্ত্রতো নেই। অথচ আমার সমাজে হোমর গন্ধহানৌ নেই; আমার বিবাহ সম্পন্ন অ'রতা রাধাকৃষ্ণর লীলাগীতির মাধ্যমে। (৩) তৃতীয়তঃ স্মৃতিশাস্ত্রর কুনো কামেউ রাধাকৃষ্ণর লীলাগীতিলো শ্রাদ্ধ করানি লাগের বুলিয়া বিধান নেই; অথচ আমার শ্রাদ্ধত উহান অবশ্য করনীয়হান। (৪) চতুর্থতঃ আমি গোড়ীয় বৈষ্ণব ধর্মত যে কীর্তনহান পাছি, ও কীর্তন উহানৌ আমি গোড়ীয় বৈষ্ণবর রীতিলো নাকরিয়ার। গোড়ীয় বৈষ্ণব শাস্ত্রর কুনো কামেউ শ্রাদ্ধহলে খমহামফাম বহানি, কীর্তনমাপু বহানি, চারিকোণে বৈষ্ণব বহানি- এসাদে রীতি নেই; এতা মণিপুরর নিজস্ব রীতি।

এসাদে বিচার করলে দেখতাড়াই যে, আমার সমাজর তিন-

চলিয়া আহের উত্তরশির মত এহান শাস্ত্রসম্মত নাইলেউ লোকাচারহান হিসাবে গ্রহণ করিয়া এহানরে আমি প্রামাণিকহান বলে পারিয়ার।

উত্তর গঙ্গে আরাকৌ অনুধাবনীয় বিষয় আহান অ'ইলতাই—
আমার সমাজে অনেক মহজ্জনর কাহিনী হুনেছি, যেতাই সাধনমার্গর উচ্চতম শিখরে কায়া তত্ত্বজ্ঞান সহকারে দেহত্যাগ করেছি। ঐ সিদ্ধপুরুষ গিরকগাছিরেউ উত্তরশির মতে দাহ করানি অ'ছে, এবং ঐ গিরকগাছিরেউ মত এহানরে ভুল বলিয়া কুনোদিন আমার সমাজর কুনো প্রাণী আগোরাডৌ নামতেছি। গতিকে, উত্তরশির মত এহান মহজ্জনসম্মত ন'নাই আমি মাতে পারিয়ার যে, এহান ধর্মবিরোধী বা শাস্ত্রবিরোধীহান নাগই। কারণ শাস্ত্রই মাতেছে যে, মহত্তর আচরণ উতাউ শাস্ত্রসম্মত প্রমাণ। শ্রীমদ্ভগবদ্গীতাই মাতের, “যদ্যদাচরতি শ্রেষ্ঠশুভদেবেতরো জ্ঞনঃ। স যং প্রদাণং কুরুতে লোকশুদনুর্বর্ততে ॥” অর্থাৎ শ্রেষ্ঠ ব্যক্তিয়ে করতারা আচরণ উতা সাধারণ মানুষাঙ প্রমাণস্বরূপ। মনুস্মৃতিয়েউ মাতের, “বেদোহখিলো ধর্মমূলং স্মৃতিশীলেচ তদ্বিদাম। আচারশৈব সাধুনাম্” অর্থাৎ মহজ্জনর আচরণ উতাউ শাস্ত্রসম্মত প্রমাণ। সুতরাং মহজ্জনসম্মত উত্তরশির মত এহান অবশ্যই শাস্ত্রসম্মতহান; উহানাত কুনো সন্দেহ নেই।

লমইতেগা উত্তরশির মত এহান আমার সমাজে কিয়া প্রচলিত অ'ছে উহান সম্পর্কে আলোচনা আহানি করিক — ১) আমার সমাজর আচার-আচরণর গঙ্গে রঘুনন্দন ভট্টাচার্য্যারাঙতৌ জিঙে মিয়াম ওড়াব পড়েছেতা পীতাম্বর সিদ্ধান্তবাগীশরুতা। ঐ পীতাম্বর সিদ্ধান্তবাগীশে উত্তরশির পক্ষ এহানরে হাবি বেদর হাবি মানুষকা সাধারণ নিয়মহান হিসাবে উপস্থাপিত করেছে। গজর অন্তোষ্টিক্রিয়া পদ্ধতির মত উহান এ গিরক এগোরহান। বারাগসী আদি ভারতর অগ্ন্যাগ্ন ফামেউ সর্বসাধারণে উত্তরশির পক্ষ এহান মানিয়া চলতারা। উহানে আমার সমাজেউ সাধারণভাবে উত্তর-শির মত এহান গ্রহণ করানি অ'ছেতা।

২) অগ্ন্যাগ্ন সমাজে বিভিন্ন ধর্মাবলম্বী আছি, কিন্তু বিষ্ণুপ্রিয়ার ভিতরে হাবি গৌড়ীয় বৈষ্ণব মতাবলম্বী। এসাদে বৈষ্ণব মতাবলম্বী

অ'মাই বিষ্ণুপ্রিয়ার প্রত্যেক ঘরর মুণ্ডে বাঙেদে অর্থাৎ উত্তরেদে তুলসী আকজার রুঝানি এহান অবশ্য করণীয় রীতিহান । মৃত্যুকালে ও তুলসী জারিত হমাদিয়া বা স্পর্শ করিয়া শেষ নিঃশ্বাস ত্যাগ করানি উহানরে আমি হাবিয়ে সদগতির পথগো বুলিয়া নিংকরিয়ার । ও তুলসী জারিত হমাদেনা বা ওজারিয়েদে মুরগো দেনার অর্থহান অ'ইলতাই মৃতদেহগোরে উত্তরশির করানি ।

৩) শাস্ত্রই মাতেরতা— উত্তর দিক এহান দেবধান বা দেবলোক অর্থাৎ মুক্তির পথহান এবং দক্ষিণ দিক এহান পিতৃধান বা পিতৃলোকে যানাবে পথ হান । উহানে আমি মুক্তিকামী এতাই দোরে উত্তরদিকে থায়া উবেদে মুরগো দিয়া হমাদিয়ারতা । গতিকে মৃতদেহর মুরগো উত্তরেদে দেনার অর্থহান অ'ইলতাই মৃতাত্মা উগোরে মুক্তির অভিমুখী করানি ।

এ আলোচনাত্ত মাতে পারিয়ার যে উত্তরশির মত এহান গ্রহণ করানিত বিন্দু আহানো দোষ নেই । গতিকে মত এহান ভুল বুলিয়া নুৰা করে দক্ষিণশির মতর প্রবর্তন করানির কোনো প্রয়োজন নেই । যে গিরিগিথানিয়ে দক্ষিণশির মতর প্রবর্তন করাত গিয়া সমাজর ভিতরে প্রচণ্ড বিভেদসৃষ্টির পথ হঙকরেদিতায়া, তানুরে এ কামেত্ত বিরত থানারকা অনুরোধ করিয়ার ।



অন্য জাতের নিঙোল আনোঁছগা ওতারে জাতে তুলানি সম্পর্কে

অন্য জাতের — বিশেষ করিয়া মিয়াওর নিঙোললো ঘর পাতিয়া
আছি বিষ্ণুপ্রিয়া মণিপুরীর সংখ্যা দেড়শ' বা দুইশ'র কাদাকাদি অ' থাইব ।
এসাদে গিরক গাছি এতারে সমাজে তুলানিরকা মেরাক মেরাকে সমাজের
কোণে-কোণে আলে'চনা আকেইহানি চলের । ১৯৭৪-৭৫ ইংরাজীত
মহাসভাত আকথুকুম এ প্রসঙ্গ এহান উঠেছিল; ১৯৮৫-৮৬ ইংরাজীত
আরাক আকথুকুম উঠেছিল; বা'রো বর্তমানে এসাদে আলোচনা আহান
চলেছে । এ বিষয়ে আমি 'অন্য জাতের লাগে বিবাহ সম্পর্কে' — নামের
প্রবন্ধত আমার বক্তব্য থছিলাউ । ও বক্তব্যর আংশিক পুনরাবৃত্তি করিয়া
আজি সমাজের মুণ্ডে আরাক কথা আহানি মা'ত্রাত বাদ্য অ'লাউ ।

এসাদে অন্য জাতের নিঙোল বুহাও করেছি এতারে জাতে তুলানিরকা
যে িরিগিথান'য়ে প্রস্তাব দিহারা, তানুর যুক্তিহানি এহানি : (১)
কভোগোষ্ঠ সাময়িক কুনো কারণে ভুল পথে গিয়াছিগা বুলিয়া তানুরে
সারাজীবন সমাজের বহিষ্ঠ'ত করিয়া থনা এহান ডাঙর নিষ্ঠুরতাহানি । বিশেষ
করিয়া এ গিরকগাছির শৌজিপুত ওতা কুনো সমাজে হমা'লুয়ারিয়া
লাঙ্গনা ভোগ করতারা । এ নিবোঁব শৌ এতার প্রতিও সহানুভূতি থানি
আমারনা থানা লাগের । (২) অন্য জাতেরতা বিবাহ করতারা মা'হুই
তানি যদি এসাদে তানুরে সমাজেও বাদ দিয়ার, উহান অ'ইলে এমনেই
সংখ্যালঘু অ'য়া আছি জাত এহানর জনসংখ্যা আন'ত্রাও কমতে থাইতউ ।
এহান সমাজের পক্ষে ডাঙর ক্ষতিহান । (৩) অন্য জাতের নিঙোল বিবাহ
করিছি এতার ভিতরে অনেক গুণ মানী মানু আছি ; এতারে সমাজের
বহিষ্ঠ'ত করিয়া থনা এহান সমাজের পক্ষে কতিজনকহান । (৪) অন্যান্য
সমাজেউ এসাদে অন্য জাতেরতা বিবাহ করতারা ওতারে সমাজে তুলিয়া
নিজর সমাজের গভীণো ডাঙর করতারা । আমার কাদাবারার বাঙালী,
অসমীয়া, মেইতেই ইত্যাদি হাবি সমাজেউ এহান দেহিয়ার । আমারাউ
এসাদে মানু ওতারে সমাজে তুলিয়া সমাজহান ডাঙর করামি লাগের ;

তানুরে সমাজে বাদ দেনা ওহান আমার সঙ্কীর্ণতাহান, এবং এসাদে সঙ্কীর্ণতা এতা সমাজর পক্ষে ক্ষতিকারক।

এসাদে যুক্তি দিতারা গিরিগিথানী এতার অন্তরে দরদ বারো মানবতাবোধ আহানি আছে ; ওহান আমি হারপেয়ার। তানুরাও সমাজর মঙ্গল আহানি করানির ইচ্ছা বারো সমাজর গণীগো ডাঙর কর নির যে মানসিকতা আহান আছে, ওহানো আমি অস্বীকার না করিয়ার। কিন্তু প্রশ্নহান অ'ইলতাই — ইকু সমাজবর্তিত বা সমাজভাগী এতার প্রতি দরদ বারো মানবতাবোধ দেহেইতে গিয়া যদি আরাক আকবেদে সমাজর বৃহত্তর ক্ষতি অ'র, বা সমাজর আরাক নির্দোষ মানু আকতার প্রতি অবিচার বা অন্যায় করানি অ'র, উহান অ'ইলে এসাদে দরদ বারো মানবতাবোধ এতা মূল্যহীন অ'য়া পড়ের। বারো সমাজর মঙ্গল করানি, বা সমাজর গণী ডাঙর করানির যে প্রস্তাব উঠেছে, ঐ ক্ষেত্রে আমারা বিচার করানি লাগতই যে, সমাজর মঙ্গল বা গণীবৃদ্ধি এতা অন্য জাতরতা বিবাহ করেছি ওতারে সমাজে তুললে অ'ইতইতা ? না, তানুরে সমাজে না তুললে অ'ইতইতা ? আকেইহান করে বিচার করে যিকগা :

(১) পইলাকার কথাহান অ'ইলতাই— অন্যায়কারীরে শাস্তি দেনার বিধান যে ধর্মশাস্ত্রত বা রাজকীয় দণ্ডবিধিত দিয়াছি, এতার দুই ধরণর তাৎপর্য আছে : আহান ব্যক্তিগত, আরাক আহান সামাজিক। ব্যক্তিগত তাৎপর্যহান অ'ইলতাই— দণ্ডিত ব্যক্তি উগোরে হারপুয়ানি লাগের যে, তা তার অন্যায় কর্ম বা অপরাধর দরুণ শাস্তি ওহান পারতা। সামাজিক তাৎপর্যহান অ'ইলতাই— অন্যায়র রোধ করিয়া সমাজে ন্যায়-প্রতিষ্ঠা করানি। অপরাধীরে শাস্তি দিলে সমাজে শিক্ষা পেইতার যে, অন্যায় করলে শাস্তি পানা লাগের। ফলে শাস্তির ভয়ে অনেকে অন্যায় কামেত্তে বিরত অ'ইতারা। অন্য দিকে অন্যায়কারীরে শাস্তি নাদলে বা পুরস্কৃত করলে সমাজে অন্যায়র পরিমাণ বাড়ে। উহানে দুষ্কৃতিকারী আগোরে কাসীমকত্তে জিৎতা করানি ওহান আপাততঃ মানবতাহান বুলিয়া মনে অ'ইলেউ, সমাজর পক্ষে অমঙ্গলজনকহান অ'নাই ওহান বস্তুতঃ মানবতার বিরোধীহান। আলোচ্য ক্ষেত্রেতো যেতাই সমাজর নিয়মশৃঙ্খলা

নামানিয়া সাময়িক মোহবশে অন্য জাতের নিঙোল আনতারাগা, ওতাই তানুর এ অপরাধরকা শাস্তি পানা লাগের । এসাদে মানু ওতার প্রতি আমারতাউ যথেষ্ট সহানুভূতি আছে, কিন্তু তানুরে সমাজে তুলিয়া পুরস্কৃত করলে এসাদে অপরাধর সংখ্যা ক্রমশঃ বাড়িয়া সামাজিক শৃঙ্খলা বুলতে কুনোতাউ না থাইতই । উহানে এ কাম এহান সমাজর পক্ষে অমঙ্গল-জনকহান বুলিয়া আমি নিঙকরিয়ার ।

প্রশ্ন উঠানি যাকরের যে, অন্য জাতের নিঙোল বিবাহ করানি এহানরে অপরাধহান বুলিয়া গণ্য করানির কারণহান কিহান ? উহানর উত্তরহানি এহানি : (১) যেতাই অন্য জাতের নিঙোল আনতারাগা, ওতার মানসিকতাত হাবিত্ত জিঙে স্পষ্ট দিকহান অ'ইলতাই আমার ভাষা-কৃষ্টি-পুষাকর প্রতি তানুর অশ্রদ্ধা বা ঘৃণা । তানুর এ অশ্রদ্ধা বা ঘৃণা এহান আরতাউ গাঢ়তর অ'রতা অন্য জাতের নিঙোল ওতা আনলেগা । এসাদে নিজর ভাষা-কৃষ্টি-পুষাকর প্রতি অশ্রদ্ধা বা ঘৃণা করানি এহান অবশ্যই ইমাণবার সেবা নাকরানি বা ইমাবাবারে অশ্রদ্ধা বা ঘৃণা করানির সমপর্যায়র অমার্জনীয় অপরাধহান । (২) নিঙোলর — বিশেষ করিয়া শিক্ষিত নিঙোলর পাত্র বিছাকেরা পানা এহান বরাবর ডাঙর সমস্যা আতান । ওতার গজে আমার সমাজর দল আহানে— বিশেষ করিয়া শিক্ষিত গোষ্ঠী আহানে অন্য জাতের নিঙোল আনানিয়ে আমার সমাজর অনেক নির্দোষ শিক্ষিত নিঙোলদীরতা পাত্রর অভাবে বিয়া নানাই এ সমস্যা এহান আরতাউ ডাঙর অ'য়ারগা । এহানো সমাজর প্রতি অমার্জনীয় অন্যায় বা অপরাধহান । এহানলো আমি মাতিয়ারতা—এসাদে অপরাধ করতারা এতারে সমাজে বরেয়া পুরস্কৃত করলে সমাজে অপরাধ বা বিশৃঙ্খলা ক্রমশঃ বাড়তই এবং সমাজে ন্যায় প্রতিষ্ঠা নাইতই ।

(২) জাতের জনসংখ্যা বৃদ্ধি করানিরকা এসাদে অন্য জাতের নিঙোল আনেছিগা ওতারেউ সমাজে তুলানির যে প্রস্তাবহান ওঠেছে, ওহান সম্পর্কে মাতাত গেলেগাউ ইমে আগর কথা আহানির পুনরুজ্জীবিত করিয়া মাতানি মনেয়ারতা যে, এসাদে গিরকগাছি এতাই অন্য জাতের নিঙোল আনানিত আগ্রহী অ'ইতারা ওহানর ডাঙর কারণ আহান অ'ইলতাই আমার

ভাষা-কৃষ্টির প্রতি মানুষের অশ্রদ্ধা বা ঘৃণা। উহানে এসাদে গিরকগাতি এতাই অন্য জাতের নিঙোল আনলেগা নিজের ভাষাকৃষ্টি রক্ষা করতাই বুলিয়া কল্পনা করে ছুয়াবিয়ার। বাস্তবে এসাদে কুনোদিন নাউ অ'ছে, ভবিষ্যতে অ'নার সম্ভাবনাউ নেই; কারণ বিষ্ণুপ্রিয়ার মানসিকতা পৃথিবীর হাবি জাতেত্ত তঙাল। এসাদে নিজের ভাষাকৃষ্টি পরিত্যাগে তৎপর গিরকগাছি ওতারেলো সমাজের সংখ্যা বাড়েয়া লাভহান কিহান? বারো এসাদে মাতৃ ভূমি'গো তুলানিত যিতেগা আরাক পাচশ'গো যদি তারুর দৃষ্টান্তনো উৎসাহিত অ'য়া ও পথ উ'গো লইতারা, ওহান অ'ইলো আমার কানাহান অ'ইলতা কিহান?

(৩) অন্য জাতের নিঙোল আনেছিগা ওতার ভিতরে অনেক গুণীমানী আছি; ওতারে সমাজে তুললে আমার মঙ্গল অ'ইতই বুলিয়া যে যুক্তিহান দেহুয়ানি অ'ছে, উহান সম্পর্কেউ আমি একেই ধরনের উত্তর দেনাত পড়তাঙাই। অর্থাৎ যেতারতা আমার ভাষা-কৃষ্টির প্রতি কুনা শ্রদ্ধা নেই বা সমাজের প্রতি কুনো দয়দ নেই, যেতাই নিজের মনিপুরী বুলিয়া পরিচয় দিতে লাজপেইতারা, যেতাই আমার জাত বা ভাষার কথা মাতলে সঙ্কীর্ণতা বা সাম্প্রদায়িকতা বুলতারা, বারো নিজের আচার-আচরণ পুষাক-ভাষা হাবিতা বেলেয়া মিয়াওর আচার-আচরণ বারো ভাষা লইলে বিশ্ব-মানবতা বুলতারা, ওতারেলো আমার সমাজের কিতা মঙ্গল অ'ইতই? বারো ওতারেলো আমার গর্ববোধ করিলতাউ কিতা আছে?

(৪) অন্য সমাজেউ এসাদে অন্য জাতের নিঙোল বিবাহ করতারা ওতারে গ্রহণ করতারা বুলিয়া ও দৃষ্টান্তনো আমার সমাজেউ ওতারে তুলানি উচিত বুলিয়া যে যুক্তিহান উৎসাহিত অ'ছে, উহান সম্পর্কে আমার বক্তব্যহানি এহানি :

(ক) প্রথমতঃ, অন্যান্য সমাজে এসাদে মানুষ এতারে তুলতারা বুলিয়া মাতানি এহান আংশিক সত্যহান। বাহিরেত্ত চেইতে 'তুলতারা' বুলিয়া মনে অ'রতা; বস্তুতঃ ভিতরে হমেয়া চেইলেগা দেখতাঙাই যে, আমার কাদার কুনো সমাজেউ এসাদে মানুষ এতারে যথার্থ স্থান নাউ দিতারা। বাঙালীরাও গিয়াছিগা আমার কুনো কুনো নিঙোলর নিঙো-

লশী উতা সাত, গুণ, বিজায় নিখুত অ'না সৰ্বে উতাবে গ্রহণ কৰিয়া
নেকুৱা পৰিবার আহান বাঙালীৰ ভিতৰে না নিকুলতারা।

(খ) দ্বিতীয়তঃ হিসাব কৰিয়া চেষ্টাবাদ— অন্য জাতৰ নিঙোল
আনেজিগাতা অন্য সমাজে শতকরা কতিগো, বারো আমাৰ সমাজে
শতকরা কতিগো। কাদাৰ বাঙালী সমাজে চেষ্টক, এক লাখৰ ভিতৰে
এসাদে মানু চাৰি-পাচগো অ'ইবা কি না'ইবা সন্দেহ। আমাৰতাতে
মুঠটো এক লাখৰ চুয়া মানু; এতাৰ ভিতৰে দুইশ'গোৰ চুয়া অন্য জাতৰ
নিঙোল আনেজিগাতা। এ অবস্থাত সমাজে যদি মানু ওতাবে তুলাত
যিয়ানগা, উহান অ'ইলে পঞ্চাশ বছৰৰ ভিতৰে তালু সংখ্যাগরিষ্ঠ
অ'ইল'কো পুৰি উঠা তালুৰ ভিতৰে আমাৰে তুলানিৰকা কৰণা দৃষ্টিলো
চেষ্টাই।

(গ) তৃতীয়তঃ হাবিত ডাঙৰ বিষয়হান এহান যে, অন্য জাতৰ
আদৰ্শলো আমাৰ জাতৰ বিচাৰ কৰলে না চলতই; আমি যে সমাজে আছি
ঐ সমাজৰ কাঠাম, মানসিকতা হাবি বিচাৰ কৰিয়া বাস্তব দৃষ্টিলো আমাৰ
আদৰ্শ লেনক'নি লাগতই। আমাৰ জাতৰ মানসিকতা চেষ্টক: নিজৰ
ভাষা, নিজৰ কৃষ্টি, নিজৰ পুৰাক ইত্যাদিলো গৌৰববোধ কৰানি এহান
হালিৰ জাতৰ সাধাৰণ লক্ষণ হান। আমাৰ জাতৰ আদৰ্শহান অ'ছেতাতে
হুদা নিজৰতা লুকেয়া মানুৰতা গ্রহণ কৰানি। বিশেষ কৰিয়া ভাষায়,
আচরণে, পুৰাকে মিয়াঙ মালোনি এহানেই আমাৰ শিক্ষিত সমাজৰ কাম্য
বস্তুহান অ'ছে। আমাৰ সমাজৰ উচ্চ পৰিবার বুলিয়াৰ উতাবতাতে ইমে
প্ৰতি বক্তৃতিতে এ লুয়াৰা এহান। এ মানসিকতা এহান যে কতি
নীচহান, উহান আমি আমক চেষ্টা কৰিয়াট বক্তৃতি লুয়াৰলাঙ। যে
মেটেইৰ দৃষ্টান্ত তুলিয়া ধৰছি, ঐ মেটেইৰ বেইবনিৰ সমাজে আছি
বুলেয়া মাতিকতা, কইগো মেটেইৰ বাঙালীৰ ভাষা-আচরণ-পুৰাক লয়া
মিয়াঙ সাজেহিতা। — কদাচিং আগো কি হুগো। মণিপুৰে মেটেইৰ
ভাষা বারো পুৰাকৰ বাহিৰে অন্যতাৰ কামো নেই; উপেই তালুৰ ভাষা
বারো পুৰাক নালইতারা উতা বীতিমতো অপমানিত অ'ইতারা। বিষ্ণু-
প্ৰিয়তাতে ইমে চেষ্টে চেষ্টে বৰ্তমানে চান খজছে উগি ছাড়া কুনো

নিঙোল বা বৌয়েইয়ে নিজর পুখাকলো বাহিরে না নিকুলতারা বুললেট
 চলের ; মিয়াঙ মালোইলেই যেন জাত এহানর মানুরতা ইজ্জত বাড়ে।
 আমার জাতর যুবকে অন্য জাতর নিঙোল আনতারাগা এহানর অন্তরালে
 ডাঙর কারণ আহান অ'ছেতাউ এ ভাষা-আচার-পুখাকে মিয়াঙ মালোনি
 এহান । এ অবস্থাত আমি যদি মিয়াঙ বিয়া করেছি-উগিরে তুলে বেলে-
 য়ার, উহান অ'ইলেতে, আর কথা নেই, ইমে বালুর বাধগো বা'গলে পানির
 ছতগো বহের উসাদে চেইতে চেইতে আমার মুনিশো' এগি হাবিগি
 মিয়াঙর জাঙেই অ'পড়তাইগা । এহানতে ইমে পানিহানাত আছে
 পরমগো ধরাত যিতেগা . পরমগো নাপানি, খলহগোত আছিল চেঙগিও
 এরেনেহান পারা ! গতিকে দিয়োবারাদেউ লোকমান ! সংখ্যাবুদ্ধি
 অ'ইলতা কুংগোদে ? উহানলো যোগি গেছিগা উগিরে আনানিত্ত পুরি
 যেতা আছি এতা নায়েইবাগা চেষ্টা করানিয়েই অধিকতর দরকারীহান
 বুলিয়া আমি এসাদে জাতে তুলানির প্রচেষ্টার বিরুদ্ধে প্রতিবাদ জানে-
 য়ারতা ।

গজর আলোচনাত দেখতাঙাই যে, আমার জাতর হাবিস্ত ডাঙর
 গলদহান আমার নিজর ভাষাকুটির প্রতি অশ্রদ্ধা বা বৃণা, বাপরা মিয়াঙর
 ভাষাকুটির প্রতি অটুট শ্রদ্ধা বা ভক্তি । এ দুয়ারা এহানর চিকিৎসা
 নাকরিয়া মিয়াঙ অ'লোছি উতারে তুলানিত গেলগা, তানুরেতে তুলে
 দুয়ারিয়া উল্টা তানুর দলে হাবি হমানি লাগতই । উহানে এসাদে
 চিন্তাধারা এতা জাতহানরে সম্পূর্ণ মাওকরানির প্রচেষ্টাহান ছাড়া কিতাউ
 নাগই ; এতা আমার জাতর কাজে মারাত্মক পদক্ষেপ ।

আরাকৌ কথা আহান, এসাদে জাতে তুলানির কথা এহান উঠেছেতা
 ও গিয়াছিগা উতার অগ্রহে ? না, আরাক যুবক কতোগোই উতার অনুসরণ
 করতে সুবিধা অ'ইবাতা বুলিয়া নিজর পথ প্রশস্ত করানিরকা প্রস্তাব এতা
 আনতারাতা ? আমিতে দেহেছিতা, এসাদে গিয়াছিগা ওতার অধিকাংশই
 নিজর কাম উতালো গর্ববোধ করিয়া সমাজরে না গণিয়া মূর ঠিকদিয়া
 আ'টতারা । সমাজর কতোগোই রিজলিউশন আহানি লইলে এ
 গিরকগাছি এতাই মূর নঙেয়া আহিতাই বুলিয়া মাতানি উহান একরকম

তবাস্তব কথাহান। আমি নিজর আহিলো দেহেছি যে, কোনো কোনো ক্ষেত্রে এসাদে জাতিভাগী ওতাবে আনুষ্ঠানিকভাবে গ্রহণ করানি সত্ত্বেও তানু নিজর পরিবার বারো সমাজর কাদাদে পেয়াউ না চেপোইতারা, বরং আরতাউ শক্তভাবে মিয়াও হাজতারা।

কুনোগোই প্রশ্ন তুলে পারতারা যে, অন্য জাতর নিঙোল আনেছিগা এতা হাবিয়েই আমার ভাষকৃষ্টি আলি পেইতারা বারো আমার সমাজে হমানি নামনেইতারা বুলানি উহান সত্যহান নাগই; এতার ভিতরে অমেকগো আছি যেতাই তত্ত্বমেউ আমার সমাজরে— আমার ভাষকৃষ্টিরে বানাপেয়া আমার ভিতরে হমানি মনেইতারা। উসাদে উতাবে সমাজে তুলানি কি থক নেইতা? উহানর উত্তরহান এহান যে, উসাদে মানু উতা ধীরে ধীরে সমাজর সংস্পর্শত আহিতে আহিতে এমনেই সমাজে হমেই-তারা। উতার অনেক দৃষ্টান্তো আমারাও আছে। এসাদে ধীরগতিতে বিবর্তনর ধারালো সমাজে হমানির পথ উগো আমিও রুদ্ধ নাকরিয়ার। বাক্য, এসাদে ধীরগতিতে তুললে আকবেদে আমার সমাজে তানুরে গ্রহণ করিয়া আমার সংখ্যাবৃদ্ধি করানির উদ্দেশ্যহানো সিদ্ধ অ'র, অন্যবেদে সমাজর শৃঙ্খলা ভঙ্গ করানির দরুণ তানু যে শাস্তি আহান পেইতাই, উহান অন্যতারাও শিক্ষার বিষয়হান অ'নার দরুণ কুনোগোই এসাদে শৃঙ্খলা ভঙ্গ করানিত থককরে সাহস নাকরতাই। কিন্তু সভাসমিতিত রিজলিউশন লয়া রাতারাতি তানুরে আনুষ্ঠানিকভাবে সমাজে তুলাত গেলো, উহানর ফলহান মারাত্মক অ'ইতই— এহান আমি দৃঢ়কণ্ঠে মাতিয়ারতা নিজর অভিজ্ঞতাত। আমার সমাজর ইতিহাস আলোচনা করলে দেখতাঙাই যে, ১৯৭৫ ইংরাজীর আগে অন্য জাতর নিঙোল বিয়া করেছি বিফুপ্রিয়া বিশ পচিশগো অ'ইবা কি না'ইবা! আজিকার এ জাতিভাগী দাপা এহানর অধিকাংশই নিকুলেছিতা ১৯৭৫ ইংরাজীত ১৯৮৫ ইংরাজীর ভিতরে। উহানর কারণহান এহান যে, ১৯৭৪-৭৫ ইংরাজীত বিফুপ্রিয়া মণিপুরী মহাসভাত এসাদে জাতিভাগী ওতাবে জাতে তুলানিরকা প্রস্তাব উঠেছিলতা। ও প্রস্তাব উহান গ্রাহ্য বারো কার্যকরী অ'য়াউ নাগই; ছদ্ম ধ্বনি উহানি উঠানিয়ে 'আমারতাতে সুবিধা অ'ইলকো' বুলিয়া এ-

দাপা এহান হাবি অন্য জাতর জাঙেই অ'ইলাগাতা । ১৯৮৪-৮৫ ইংরাজী
 বা-রো এসাদে গিরকগাছি এতারে আনুষ্ঠানিকভাবে তুলানির কথা আহান
 উঠিল; কিন্তু আমার প্রচণ্ড বিরোধিতার ফলে উহান কার্যকরী না'ইল;
 উহানে উতার পিছ এহানাত আমার যুবকর ভিতরে অন্য জাতর নিঙোল
 আনানির প্রবৃত্তি এহান কমেহেতা । উহানলো আমি সাবধান করে
 দিয়ারতা — এসাদে আনুষ্ঠানিকভাবে সভাপনিতত রিজলিউশন লয়া ও
 জাতিভাগী উতারে তুলানিত যানা উহান মারাত্মক পদক্ষেপহান; উসাদে
 কামে পদক্ষেপ নালইবাঙ; নাইলে আমার আজি গাবুবাপুয়েই এতা থাক-
 গোরেউ নাপেইতাঙাই, বারো আমার নিঙোলরে মিয়াওবাঙ বাচে বাচে
 দেনাত পড়তাঙাই । অন্যান্য জাতেউ এসাদে জাতিভাগী উতা বা-রো
 আয়া হমাছিহাতা ধীরে ধীরে — বিবর্তনর ধারালো । কোনো সমাজেউ
 সার্বজনীন সভাত রিজলিউশন লয়া এসাদে মানুরে না তুলেছি; কারণ
 এসাদে করলে সমাজর শৃঙ্খলা রক্ষা করানি সম্ভব না'র । বিক্ষুপ্রিয়র
 সাদ স্বভাবাকৃষ্টিপরিচয়গে যত্নশীল জাত আহানর ভাঙে আর কথা নেই,
 এসাদে আনুষ্ঠানিকভাবে সমাজে তুলানি এহান মৃত্যুর পথগো ।

আমি মাতে গেলাঙা কথা এতা হাবির কেন্দ্র বিন্দুগো অ'ইলতা
 এহান যে, সমাজর যে কোনো কাম বা সংস্কার করতে গেলেগো — সমাজ
 এহানরে সুন্দর করতে গেলেগো পইলাই আমারতা দরকার সমাজচেতনা ।
 আমার ভাবাকৃষ্টি পুষ্কার প্রতি শ্রদ্ধা এহান আমার প্রতি পদক্ষেপে থানা
 লাগতই — আমার প্রতি রক্তবিশুদ্ধ এ শ্রদ্ধা এহান হমানি লাগতই ।
 ও সমাজ চেতনা উহান আহানির আগে কাচা বরণ গালাত নাখিবাঙনা ।
 আমার সমাজর প্রত্যেকগো মানুহাও যেবাকা এ সমাজ চেতনা এহান আহি-
 তই, উবাকা আমি হাখিতা মুরা দৃষ্টিলো বিচার করতাঙাই ।

আমার জাতর নাও শ্রী কালী প্রসাদ সিং

স্মরণাতীত কালেষু পুরি আমি নিজের জাতি হিসাবে 'মণিপুরী' বুলিয়া পরিচয় দিয়া আহিয়ার। সরকারী নথী পত্র বারো জমির দলিলেও আমারতা ইচ্ছা 'জাতি মণিপুরী' বুলিয়া উল্লেখ করানি অ'র। এ শতাব্দীর মধ্যভাগেও আমার ভাষা-সচেতনতা আনিয়ে, বিশেষ করিয়া ১৯৬৫ ইংরাজীতে ভাষা-আন্দোলন আরম্ভ অ'নার ফলে আমার ভাষার 'বিষ্ণুপ্রিয়া মণিপুরী' বুলিয়া পরিচয় দিতে গিয়া আমার জাতহানরেও 'বিষ্ণুপ্রিয়া মণিপুরী' বুলিয়া মাতানির প্রবৃদ্ধি আহান আমার ছাত্র-দুবকর ভিতরে দেখা দিয়াছে। উহানে বর্তমানে প্রশ্ন জাহান উঠেছে—আমার জাতর নাওহান 'মণিপুরী' ? না, 'বিষ্ণুপ্রিয়া মণিপুরী' ? এ প্রশ্নে আমি নিম্নোক্ত বক্তব্য এহানি থনা মনেইলা :

আমি ইচ্ছা 'মণিপুরী' নাও অনুরত শ্রেণীর (O.B.C.) অন্তর্ভুক্ত অ'য়া সুযোগ-সুবিধা পেয়া আহিয়ার। ইদানীং কালে ভারত সরকারে প্রকাশ করেছে অনুরত শ্রেণীর তালিকাতে 'মণিপুরী'-জাতর নাও আছে, কিন্তু 'বিষ্ণুপ্রিয়া মণিপুরী' বুলিয়া কুনো জাতর নাও নেই। গতিকে জাতর নাও 'বিষ্ণুপ্রিয়া মণিপুরী' দিলে আমি ও অনুরত শ্রেণীত না হমেই-তাড়াই, এবং আমি পেয়ার সুযোগ-সুবিধা এত্তা বঞ্চিত অ'ইতাড়াই। আমার জাতর নাওহান 'মণিপুরী' বললে ও সমস্যা নেয়ার

অংশাই আমিও আন্দোলন করিয়া বা সরকাররাত দাবী করিয়া অনুরত শ্রেণীর তালিকাতে লুয়া করে 'বিষ্ণুপ্রিয়া মণিপুরী' নাওহান যৌকরানি পারিয়ার, কিন্তু উহান অ'র কি না'র, বা, অ'ইলেউ কুনদিন অ'র ঠিক নেই। ধরিয়া নিলাঙগা যে, আমি ভাতিতে 'বিষ্ণুপ্রিয়া মণিপুরী' হিসাবে সরকারর স্বীকৃতি পেইলাও। তথাপি আমারতা বিচার করানি লাগতই যে, আমার জাতরতা এ নাও এহান লইলে লাভ অ'ইতইতা, না, লোকসান অ'ইতইতা।

পইলাই চেইক, আমি পৃথিবীত পরিচিত অ'ছিতা 'মণিপুরী'—নৃত্যলো হারো রাস-কীর্তনাদি 'মণিপুরী' সংস্কৃতিলা। আমি নিজেরে

‘মণিপুরী’ বুলিয়া পরিচয় নাদলে এ ‘মণিপুরী’ নৃত্য বারো সংস্কৃতির অধি-
 কারেই আমি বঞ্চিত অ’ইতাইতা এবং এতা হাবির অধিকারহান মেই-
 তেইরাও যিতইগা। আমার নৃত্য বারো রাস-কীর্তনাদি সংস্কৃতির মাঙো
 ‘বিষ্ণুপ্রিয়া মণিপুরী’ দিতাঙাই বুলিয়া যদি কুনোগোই নিঙকরে থায়াব,
 উহান অ’ইলে আমি মাততাঙাইতা, উহান সম্পূর্ণ অসম্ভব বারো অসম্ভব
 কথাহান। কারণ নৃত্য বা সংস্কৃতি আকহানরে আকতাই ‘মণিপুরী’
 বুলানি, বারো আরাক আকতাই ‘বিষ্ণুপ্রিয়া মণিপুরী’ বুলানি উহান আমি
 কুনো যুক্তিলো প্রতিষ্ঠিত করে নুয়ারতাঙাই। ও কারণে কুনো সামাজিক
 বা সরকারী কর্মসূচীত আমার নৃত্য বারো রাস-কীর্তনাদি সংস্কৃতিরে ‘বিষ্ণু-
 প্রিয়া মণিপুরী নৃত্য’, ‘বিষ্ণুপ্রিয়া মণিপুরী রাস’ ইত্যাদি নাঙে উপস্থাপিত
 করলে উত্তর বিচ্ছেদে আহিতই প্রতিবাদ উতা খণ্ডন করানি আমার পক্ষে
 সম্ভব নাইতই, এবং একই কারণে সরকারেই আমার নৃত্য বারো সংস্কৃ-
 তিরে ‘বিষ্ণুপ্রিয়া মণিপুরী’ নাঙে প্রচার নাকরতই। আরতাউ চেইক,
 আমার নিঙোলগীর পুষাক এহানো ‘মণিপুরী’ পুষাক বুলিয়া হাবিরাও পরি-
 চিতহান। আমার জাতর নাঙহান ‘বিষ্ণুপ্রিয়া মণিপুরী’ বুললে এ পুষাক
 এহানরেই ‘বিষ্ণুপ্রিয়া মণিপুরী’ পুষাক বুলিয়া মাতানি লাগতই; উহানো
 বাস্তবে সম্ভব নাইতই। কারণ পুষাক আকহানরে আকতাই ‘মণিপুরী’
 পুষাক বুলানি, বারো আরাক আকতাই ‘বিষ্ণুপ্রিয়া মণিপুরী’ পুষাক বুলানি
 উহান সম্পূর্ণ অযৌক্তিক কথাহান। আমার জাতহানর ডাঙ ‘মণিপুরী’
 দিলে এসাদে সমস্যা এতা না উঠেই।

এনেই প্রশ্ন আহানি উঠানি যাকরের : (১) লোকগণনাত আমি
 আমারে ‘বিষ্ণুপ্রিয়া মণিপুরী’ বুলিয়ার; এ অবস্থাত আমি আমারে হুদা
 ‘মণিপুরী’ বুললে কিসাদে অ’ইতইতা? (২) জাতর নাঙলো ভাষার নাঙ
 অ’না এহানেই স্বাভাবিকহান। আমারতাতে জাতর নাঙ ‘মণিপুরী’
 বারো ভাষার নাঙ ‘বিষ্ণুপ্রিয়া মণিপুরী’ অ’না এহান কিসাদে? এ
 প্রশ্নর উত্তরহানি এহানি : (১) লোকগণনা অ’রতা ভাষার নাঙলো; জাতর
 নাঙলো নাগই। (২) জাতর নাঙে বারো ভাষার নাঙে সব সময়

সমান না'র। দশম শতাব্দীর আগে সংস্কৃত শৌরসেনী, মাগধী ইত্যাদি বিভিন্ন ভাষা আছিল, কিন্তু ঐ ঐ নাঙে কোনো জাতর নাঙ নেয়োছিল। বর্তমানেই একেই নাগা-জাতর ভিতরে আঙ, অঙ্গামী ইত্যাদি বিভিন্ন ভাষা আছে ; একেই বাঙালী-জাতর ভিতরেই ছিলেটি বাংলা, ঢাকাইয়া বাংলা ইত্যাদি বিভিন্ন ভাষা আছে। ঠিক উসাদে আমারাট একেই 'মনিপুরী' জাতর ভিতরে ভাষা আহানরে 'মেইতেই মনিপুরী' (মনিপুরী), বারো আরাক ভাষা আহানরে 'বিষ্ণুপ্রিয়া মনিপুরী' বুলতে কোনো অপ্রাধিকার নেই। উহানে আমি মাতিয়ারতা—আমার জাতর নাঙ 'মনিপুরী', বারো ভাষার নাঙ 'বিষ্ণুপ্রিয়া মনিপুরী' বুলানি এহানেই যুক্তিযুক্তহান।

আমার মাতৃভাষার নাঙ

প্রাথমিক শিক্ষাত আমার মাতৃভাষা চালু করানি বারো বেতার এবং দূরদর্শনে আমার মাতৃভাষা অল্পটান প্রচার করানির যে আন্দোলনহান সমাজে চলেছে, বর্তমানে এহানর হাবিত্ত ডাঙর প্রতিবন্ধকহান অ'ছেতা আমার ভাষার 'বিষ্ণুপ্রিয়া মনিপুরী' নাঙ এহানর বিরুদ্ধে মেইতেই গিরিগিথানীর প্রতিবাদ এহান। কারণ তামু মাতৃতারাতা—আমি উনি মনিপুরী নাগই; গতিকে আমার ভাষার নাঙহানর লগে 'মনিপুরী'-শব্দগো দেনা না'ইতই। সরকারেই তামুর মত এহানর প্রতিকূলে কোনো পদক্ষেপ নেনা ছুয়রের।

এ সমস্যা সমাধান করাত গিয়া আমার কোনো কোনো গিরিগিথানীয়ে মাতৃতারাতাই—ভাষার নাঙ হুদা 'বিষ্ণুপ্রিয়া' অ'য়াউ থাক, ভাষাহান পেইলে লম'ইলনাট! এ গিরিগিথানীহতা ভাষার স্বীকৃতি পানা উহানেই একমাত্র উদ্দেশ্যহান, উহান পেইতে গিয়া অন্য হাবিত্তা বিসর্জন দিতেই তামু রাজী। এ সম্পর্কে আমি বলুবা খানি থনা মনেইলাঙ।

পইলাকাব কথাহান অ'ইলতাই—মেইতেই গিরিগিথানীয়ে এহানেই আমারে 'মনিপুরী নাগই' বুলিয়া প্রচার করতারা এবং কাকেইহান লেহে আমারে 'মনিপুরী'-শব্দ এগো ব্যবহারেত বিরত করানিরকা বাক্য, লেখনী, এমন কি দৈহিক বল পর্যাস্ত প্রয়োগ করতারা। এ অবস্থাত আমি 'মনিপুরী'—শব্দগো বাদ দিলে তামুর প্রতিবাদ উহাম মূর নঙেয়া মানিয়া নেনাহান অ'ইতই। ফলে আমি 'মনিপুরী'—শব্দগো বাদ দিয়া ভাষাহান

গ্রহণ করানির লগে লগে মেইতেই গিরিগিথানীয়ে যেবাৰা পত্ৰপত্ৰিকাৰ মাধ্যমে 'বিষ্ণুপ্ৰিয়া' এতাই তামু মণিপুৰী নাগই উহান স্বীকাৰ কৰলা' বুলিয়া প্ৰচাৰ কৰতাই, উবাৰা আমাৰ ইজ্জত কুমপেই থাইতই, এবং আমি কিসাদে নিজৰ মণিপুৰীত প্ৰতিষ্ঠিত কৰতাঙাই ? উবাৰা জগতৰ বুকৈ নীচ কৰো হেয় প্ৰতিপন্ন অ'না ছাড়া আমাৰ গতান্তৰ নেয়'ইতই ।

দ্বিতীয়তঃ, আমাৰ মণিপুৰীত যান্ধাৰ লগে লগে আমাৰতা মণিপুৰীত লগ যুক্ত অ'মুখ্যিক হাবিতা বিসৰ্জন দেনা লাগতই । মণিপুৰী নৃত্যৰ লগে আমাৰ ভাষাৰ এলা আহান দেনাই মেইতেইৰ তৰফে প্ৰতিবাদ আহিতই যে, মণিপুৰী নৃত্যৰ লগে অ' মণিপুৰী বিষ্ণুপ্ৰিয়া ভাষাৰ এলা দেনা না'ইতই । ফলে সাৰ্বজনীন কুনো অনুষ্ঠানে বা দূৰদ নাগিৰ অনুষ্ঠানে আমাৰ মাতৃভাষা লা মণিপুৰী নৃত্য পৰিবেশন কৰামি সম্ভব না'ইতই । অৰ্থাৎ যে উদ্দেশ্যলো আমাৰ আন্দোলন ও উদ্দেশ্যহানেই সিদ্ধ না'ইতই । উতাৰ গচ্চে যে মণিপুৰী নৃত্যলো আমি পৃথিবীৰ মুণ্ডে ডাঙৰ অ'ছি, ও নৃত্যৰ অধিকাৰেই আমি বঞ্চিত অ'ইতাঙাই ।

তৃতীয়তঃ, 'মণিপুৰী'-শব্দগো বাদ দেনাৰ লগে লগে মণিপুৰৰ ইতিহাস, সংস্কৃতি ইত্যাদি হাবিতাও বিভিন্ন অ'য়া সম্পূৰ্ণ চুয়া জৰম অ'ছি জাত আহান হিসাবে পৃথিবীত আমাৰ পণ্ডিত্য দেনা লাগতই । উবাৰা কাকেইহান লেহে হাজাৰ মানুখে 'ভূমিতে হুতুমো মণিপুৰী নাগইথাঙে ?'— বুলিয়া প্ৰশ্ন কৰতাই উঠেই আমি জগতৰ মুণ্ডে কতিহান মিলল বা ভৰ্কাও অ'ইতাঙাই, উহানৰ পৰিমাণ নেই । ফলে আমাৰ পৰবৰ্তী বংশধৰৰাও আমি চিত্ৰকাল কদাৰদিত্তি অ'য়া থাইতাঙাই ।

জাত এহানৰ এতা হাবি ভবিষ্যতৰ কথা না খ'লকৰিয়া 'একাৰা ভাষাহান পেইলে লম'ইল' বুলিয়া চট্কাৰে 'মণিপুৰী - শব্দগো বাদ দিয়া ভাষাহান গ্ৰহণ কৰানি উহান বিচাৰহী'নতাৰ চৰম নিদৰ্শনহান । অনেকে মাততাহাই— 'জাতি হিসাবে আমিহে এমমেই মণিপুৰী আছিনাই, ভাষাৰ নাঙৰ লগে 'মণিপুৰী'- শব্দগো না থাইলেতে কিতা'ইল ?' কিন্তু আমাৰ মণিপুৰীত সম্বন্ধে আপত্তি থানাইহে প্ৰশ্ন এতা উঠেৰতানাই ! এ অবস্থাত ভাষাহানৰ নাঙে 'মণিপুৰী'-শব্দগো বাদ দিলে আমি মণিপুৰী নাগই বুলিয়া স্বীকাৰ কৰানিহান অ'ইতই । উহান আত্মঘাতী পদক্ষেপহান । উহানে আমাৰ ভাষাৰ নাঙহান 'বিষ্ণুপ্ৰিয়া মণিপুৰী' অ'নাই লাগতই ।

